


愉園詩集

甲午上巳
花嚴



PL
2780
.J56
v.1



Digitized by the Internet Archive
in 2009 with funding from
Ontario Council of University Libraries

明清四百載古詩日姜靡五子連三家尚存屈宋旨惡藻盛清初
末華風變徵或以險峭鳴或從怪異始近體易入時古調聊自喜
屹立湘綺樓高詠倡選體依然知音稀和者多多士通讀愉園集
閩人却嗜此筆暢所欲言直似臂使指老拙步宛陵朴近歐陽子
時同我生晚恨未接文几好古心則同循跡各異軌我崇正始音魏
晉有遺美長篇誇樂府情摯愛蘇李陶謝千古手宋賢亦奴婢
讀李東谷先生愉園詩集書後即呈

汝鏗詞長正意

一九七五年歲次乙卯六月南海山陰楊震于雲城



J56
v.1

YORK UNIVERSITY
JUL 03 2001
EAST ASIAN STUDIES

愉園詩集

孔德成題



1005 4 1 1114

新圖釋義

不無為

世經詞

一九二七年出版



愉園詩集序

予久客舊京夙聞李君次貢工詩其得諸傳誦者零章斷句而已前數年昉得就讀十數篇歎為難得尤喜其雪前一詩能狀欲雪未雪景象之奇為前人所未道於時君方游海上年餘歸又游大連既又與所知偕游華山獨躋其巔繼游濟南游江南杭州歸又過鄭州至武昌轉游廬山循江入海歷南洋羣島又年餘出游江南予亦好游既衰而慵又有所牽阻不得如願君則視千萬里若戶庭乘興輒行無疑滯不能徐霞客亦殊有戴鷹窠一聞華嶽樸被遽往之風且每游必有述謨行篋所載詩稿半焉去年春杪君南行瀕行屬予序君詩諾

而未報歲暮君歸乃索得君全稿竟日夜讀之徧燦若
煙雲之生紙上奇峰絕壑殊俗異境紛然其駢散於吾
前妙筆精思盤旋迴合矯然畧無所倚傍尤有獨至者
詩中於骨肉交游離合悲愉之故長言往復愴惻纏綿
可以感人心而式澆俗是則未可僅以聲韻求之者已
昔顧氏亭林以學者不出游為面牆而立誠以讀書行
路有相濟之功而性情之激發必有江山朋友之助君
性誼摯厚而復銳於游覽經壑尋邱在他人徒以侈選
觀者君則藉以養其天倪宜其發而為言卓爾足以有
立也君出螺洲陳太傅門下而石遺散原二老亦所嚴
事者詩學淵源之宏遠人所共知不待言乙亥人日愚

弟何振岱謹序

序二

台灣蘊山海靈淑之氣詩風籍甚益以邇來國中騷人
雲集一時吟事颺舉蔚為大觀惟世運既降詩亦隨之
就予來此後耳目所接率多膚廓滑澤之辭求其氣韻
法度駸駸入古者蓋寡獨於友人所見愉園先生五古
一篇典重雅健迥不猶人時與先生未識面固已心儀
之一日廣座中因介獲交氣求聲應遂如故知謂予可
與言詩出示所著愉園詩集讀之含懷賈遠吐辭雋拔
外枯而內腴貌遺而神會語多橫硬而意極曲折尤於
刻劃物態宣達人情能逼真而曲盡闕其所造益循宋

潮唐胎息韓孟而得其神髓者自是所夕恒以詩相切
劘予雖齡頽殖落而猶得稍窺前人門徑者先生力也
親炙既久更審其為人厚重閒靜澹於榮利篤親而敦
友詩根性情宜乎有其不可磨滅者在抑吾聞先生之
為詩初亦甚喜近體工藻績流利之什及游牧菴石遺
二老門始專致力於古盡屏少作故其集中所存古風
獨多而五古尤夥頤而精卓間厠如予今體亦緣情循
實不稍涉浮靡然則有識之士欲轉移風氣以進於古
循其軌而倡導之其於詩之起衰庶有裨乎甲午夏至
合肥袁試武序於臺中廨廬

題辭

讀愉園詩

彭醇士

吾交閩士多能詩類傑出識君二十載敢謂相知密
向來安霧隱山澤養奇逸蔚矣玄豹姿彪炳貫天日
堂堂聽水齋高牆九仞岸能窺不數人晚許君入室
君詩曹洞樺真味豈易別冷暖內自知證想兩俱失
平生五岳游匡君夙所謁疑過樓賢橋清寒入山骨
坡翁固人豪語妙亦無匹聊持喻君詩堅瘦巖植列
次老以所著愉園詩集授讀因再次酒韭成韻
敬題其後歸之

袁試武

公詩如天廚點滴皆天酒豐腴屏晏鯖寒薄黠度韭

賤子如賤妾初來執箕帚竟許可與言情深類交久
閱我室暗室力為開新牖探篋出巨帙鏡若開仁壽
俾知用管雖不足察高厚金丹換骨訣授以簡當口
萬象歸亭毒海涵兼地負讀竟三百篇深佩能有九
非敢望傳衣杖來三擊白寶對五言城早卽甘低首
矧擅各體長儼陳彝壘南雅疏尊彝上壘下自居中睹此詩中
豪孰不僵且走季通師晦庵偏荷稱老友食德飽八
珍飲和醉三酉宣尼善誘人勿謂今爲有不信視吾
公巧雕及糞朽

讀次貢西行紀事之什畢感賦

劉幼蘅

龍頭失節龍尾佚北枝耐寒南枝熱朋友兄弟勿苟
同古且難能況今日李子不幸適遭逢轉以艱難見
果決知幾引去涕潛揮初衷宣願謀獨潔身行萬里
歷險巇事遇回思猶股慄棲寺有婦膺同心繫汲縫
紉自供給督責誰加草野身矢死靡他全吾節節全
猶恐世人知作詩但托游蹤說由來高士喜逃名後
世終難瞞史筆

愉園詩集目錄

卷一 民國十二年以後旅食平津時作

讀荀子

滄趣師重宴鹿鳴賦呈

贈柯某之遼東參軍

送張雲蔚南歸

哭陳公荆

次韻和飽廬丈詠折枝

陳能羣贈橄欖

詩之作

次和陳繼庭留別之作

廣渠門外真七弟

疊前韻答繼庭

示遂兒五十韻

再疊答

武德將軍歌

呈黃石孫先生

崇陵感作

贈劉孟純

題元遺山詩後

滄趣師八十賜壽賦呈

堂見懷之什

謝曾仙舟贈近代詩鈔

長至夜不眠枕上作

和繼庭登高之作

至日涉園

題董小宛病榻圖

聖死

哭陳陀庵

初嘗黃河鯉

卓君庸招集自青榭

閒居述愉園三十韻

題唐代二娘子墨蹟家

十一月十五夜待月

書

典大理院舊牘

以近作就正許疑庵與

紀夢

談有得

哭鮑廬丈

用韻和黃嘿園游抱水

和方策六苦寒

贈高蔭甫

其歸里

病榻口占

嘿園於書攤得王荊公

苦雨謠

詩四葉以補綴其案

次和林子有新居落成

頭殘本適合索賦

張蟹廬導觀蜂場感作

歸途賃車感作

諱日供餽適石遺師書

欲雪

至告省志孝義傳已

小集策六齋中依韻和

刻成

寄疑庵

蕭謙中移居卽次其近

陳伯南寄書云昨夢與

作韻調之

予煮茗談詩醒得一

林莘奮六十賦贈並送

絕索和作應

星士陳某為予批算年

霸州河

命感作

除夕

過周補廬世丈老牆根

舊居因懷周松孫及

葉張二師

卷二

全前

以上兩卷舊稿散亂間有失次

上巳水榭禊集拈花字

贈蔡星符

侍滄趣師賜臺看杏花

同林放丈何梅叟陪滄

贈董季友丈

趣師遊香山

和鄭邁菴生日自歎

客某歸自大連喜晤賦

玉蘭歎

贈

西陵八景圖為陳何元 無罪

題

哭林若卿

程育庭同年以所著說 酬策六

文籀古篇見贈賦謝 湯山旅館題壁

並乞舊著九朝律考 過伯南寓齊邀蔭甫共

送內姪陶燠民往日本 話

奈良教授 題燕衷所著燕京叢考

女夫陳任襄挈秀穎及 次和伯南苦熱

外孫避亂來平即送 贈林碩田

任襄先回鄭州 游大連有贈

寄陳吉廬 八月望偕黃嘿園葉杰

三泛舟八里臺

陳伯稼仲經少奇昆仲

星符奉諱南歸追送不

述母德乞詩作應

及補詩為別

送兼與之武昌賦贈並

陳仲起丈出示新詩倒

簡嘿園

次贈什一首韻答

兼與寄示游抱水堂詩

落葉四首和嘿園

次和並寄嘿園

贈莊思緘院長

擬寒山詩

以蒸羊遺林梅南媿以

此詩

卷三

民國二十年以後旅食新都及僑居魯滬時作

南行雜詩

黃公渚至都約同出游

樓霞躋佛二首

第六書告違事甚悉附

舊識某於秦淮牽船為

寄一詩以質真見許

毛重五招飲次贈詩

詩以答之

韻酬之

同陳巖孫吉廬游京口

江春筠約游雞鳴寺即

同陳虛谷夙之幾士雞

次其韻

鳴寺登高即送幾士

三月予歸北平伯南已

趨覲

南來嗣是三度相失

題樓霞洞

承示游湖詩次和

呈林放庵丈

西湖二首

謁散原先生廬山

送林仲立歸長檢察署

登五老峯放歌

出游過雲海至三疊泉

禊日集十剝海分膺字

望泉不見在巖上煮

游華山

茗進食雲久不散

歸游龍門

辛未除夕居廬山次東

陸丹林屬題紅樹室時

坡歧下寄子由韻

賢書畫集

元夕在鄭過別族弟濟

命法院公役導游千佛

川及穗妹堅留一醉

山

游開封三首

游錦屏

敬跋先公遺墨

龍洞

拔牙

佛峪

補齒

龍洞歸途口號

罷郵望家書不至

靜安寺路散步入市歸

趵突泉

作

法院題壁

題夏劍丞映庵填詞圖

過藏泉樓閱玉函山房

去思臺圖為何元題

所藏古幣

三十年留影合裝冊為

為葉某題雲海探奇圖

錄

葉沆辰題

再至南京喜晤鶴亭賦

贈

有答

卷四

民國二十一年六月以後旅食新加坡時作

游新加坡動物園

次徐伯良韻與之論詩

除夕感作

學泳

元旦遣筆

偶成

題拒毒專著卷端

次韻答蕤衷

觀舞

續新加坡雜詩

游植物園

花肆主人程薰南以予

新加坡雜詩

久未過寄詩詢故次

贈徐翁季鈞

韻戲答

清明寄仲兄及諸弟

聞遂兒死耗倉卒在龍

張柳池喪女述夢蹟乞

小寺用前韻哭之

詩

再哭遂滋五首

贈過客

生日感作寄喬平八弟

再續新加坡雜詩

卷五

民國二十二年十二月過港及來往兩都時作

曉發香港覓渡石龍晚

蝦公巖觀五色蝦

宿九齋堂翌日至羅

小憩黃龍觀

浮

羅浮紀游

到白鶴觀出探近勝

旅居香港回憶山中諸

稽首巖

勝各繫一絕

過寶積寺飲卓錫泉

客有尚戀香衾輕視仕

黃龍洞下入谷仰望龍

版之朝賦答

珠亭

滄趣師以戊申以前稿

滌塵橋

命校因自鈔一帙敬

跋其後並呈

曹纓蘅見過鑑園因邀

石遺師觴客以魚翅為

淮濡茗話

號召有知為予所饋

初涼得牯嶺友人書却

者來書見戲賦答

寄

南行攜遂兒遺履伴裝

七夕得室人書却寄

觸目輒思寫此遣悲

邵筱珍郭組南誤以八

坐曹第一日作

月二十六日為予生

甲戌上巳後湖禊集分

日邀飲賦謝

得非字

九日集嘉蒙樓拈條字

舊都詩人禊集南海代

同林羣乙何逸凡入市

拈後字

選蟹醉後作

策六約棲霞看紅葉阻

讓蘅主黥民政寄示重

霧未赴詩來詰問答

之作次酬

曹靖陶屬題看雲樓覓

嘿園為母壽讚佛徵詩

句圖

為黃蔭亭題瀛槎三泛

除夕聞嘿園傷足賦訊

圖

哭滄趣師

李某寫示醉司命詩次

贈王彥和

和並寄讓蘅

策六罷官北旋賦贈

先師忌日寄嘿園虛谷

問禮亭分得親字

送李惕之就駐巴拿馬

送沈簣基赴駐西貢領

使館秘書

事任

讓蘅寄示近作次和

丙子上巳禊集秦淮水

廬山

謝分得光字

送肖桂女姪歸滬並堅

郭逸濂以孝陵看梅詩

餽蟹之約

索和次答

贈林魯生

清明日同組南公園晚

丙子重九青溪國學二

步組南有詩次和

社集浣花樓以事未

漢燾平辟央瓦影片為

赴分願字

金松岑題

棲霞看紅葉組南督為

與客談嘿園以韻語述

詩指殆字為韻

之因寫贈

續蘅寄示九日詩次酬

鏗女來聚旬日送其游

虛谷置宅城北賦贈

兼與書告將歸觀乞贈

唐模村訪疑庵

詩娛母賦應

題疑庵眠琴別圖

子有新居落成索詩

檀干公園疑庵同坐

補廬丈七十觴客因舉

西干公園

平昔所心折者賦侑

黃山歸途餘意成

唐念慈生女作此詩媵

曾少魯乞題先德事畧

以葡萄糯米酒賀之

哭石遺師

題力舒東述母德篇後

耀滋赴美留學卜行有

為施季辰題錦灰堆圖

期作此勗之

又一圖

游黃山

卷六 二十六年八月以後避敵轉徙各地時作

西行紀事二十五首

仲謙亦於是日觴客

初到大定羅仿伊約作

大定初禁釀近更禁飲

郊游

仲謙作詩索和

方言成營長索贈詩放

楊茂崖招飲與訂後期

歌勗之

游畢節廖專員邀觀劇

趙泉生冢孫伯剛排長

步其成韻

禦敵湘西殉職三載

覽揆日得禾女生女訊

請恤未達作慰泉生

喜寄

重五仲謙餽角黍餅餌

仲謙函示耆社重九諸

俗於重五翌日治酒食

作步韻奉酬

端五日金雪塋過飲承

三家壽序合裝本

次舊作韻見贈疊酬

移居疊成韻二首

再疊答

疊前韻嘲羣乙昆明食

次孟純贈詩韻題其見

石蟹致疾

心集

羣乙書告昆明遇馬神

病眼疊前韻簡雪塋乞

廟京師大學堂同學

方

最年少者亦髣髴齒

聞雪塋購得影宋聖教

豁疊前韻作寄

序三疊前韻簡之

次韻雪塋元旦見懷

次和沈羹梅自壽二首

丙戌人日孟純招飲學

題雪塋尊人磷叟先生

田陂酒樓分得總字

葉可立將之蘭州為其

楊茂崖書告與雪騰早

夫人六十索詩

結墨緣乞詩紀之

雪騰見和前詩再疊酬

卷七

三十五年邂逅北平及越二年就養居臺後作

與嘿園別十五年故都

送其再赴瀋陽

喜晤賦贈

再疊前韻謝受正贈貲

次韻答純衷贈什

輓郭敵麓絕句十二首

嚴孟羣以其從祖幾道

贈純衷

先生墨蹟乞題作應

陳逸韓滯蜀有詩寄意

贈薛倣周丈

用韻和答

喬平除夕歸步受正韻

有感和策六

戰前銀行儲蓄意可得 端節灌園集標社詩人

巨貲與五弟約同歸 觴詠次楊笑儂韻作

掃墓換算濫幣不足 臺中公園納涼看烟火

春一宿糧疊成韻作 限佳韻灌園約同作

客某以梅畹華松鳥屬 次和子有重游泮水

題再疊前韻作 李拔可以十年前乞書

孟純以詩大王見戲三 之筴見還根觸舊事

疊前韻戲答 次疾齋韻作寄拔可

林灌園陷敵五十餘年 灌園招飲於其霧峰里

不肯學日語詩以張 第因述所知賦此

之 題林允卿先生銅像

次韻題菜園

送灌園游日本

劉放園寄示墨巢重九

簡惕園見和拙作次答

讌集之作次和

次韻酬灌園

疊成韻題君庸用筆九

筱珍寄示重回譯署之

法

什次答

墨巢屬帶重九唱酬集

胡慶育步筱珍韻見贈

人與書俱葬魚腹壘

二首疊酬

前韻寄墨巢

林社五十周年敦民徵

次答策六兼與贈什

詩見及疊前韻寄題

灌園逸游龜盧寺同作

蔡北崙乞詩即題其頑

題倣園織素圖記卷後

鐵道人傳後

劉幼雪以所居宋荔山 潘伯敬寄示悼亡草亟

房詩徵和作應 以三十韻廣之

灌園在日本寄贈西洋 七十劉幼蘅贈詩故人

酒疊年韻奉謝 見規意良可感作此

次成韻贈敦民 奉酬並以解嘲

陳甘籥索和五十九述 疊成韻約敦民伯敬幼

懷詩作應 蘅夙真來游

次甘籥述懷韻 夜起飲酒成癖三疊成

案有映字鏡器也人如 一首

羣已七十借為比成 展重陽日彰化集吟贈

一什 吳蘅秋並寄灌園

伯敬寄示壽幼蘅詩次

酒韭韻試武三疊見寄

和並寫贈幼蘅

以示幼蘅幼蘅和詩

題伯敬三十年儂影

索交且督予作

次和幼蘅見題西行紀

試武四疊見寄疊和

事之什

幼蘅和詩以夢得元白

北齋七十在靈山寺疏

為喻試武和詩以予

筵款客席中遇彭醇

為召戎疊答

士屬題蒼虬圖因成

題金篋孫安樂鄉人集

袁試武見過因以詩集

託其評定和韻成

卷八 四十二年一月以後作

仲少梅寄示初度述懷 老蓮花三疊前韻

次酬 歲癸卯予與季弟受正

小園疊石成疊前韻邀 同案入庠親庭即擇

少梅鐵人諸詩老 簪花日為予完娶及

仲少梅孫鐵人彭醇士 今回憶五十年猶昨

袁試武蔡北崙王文 日耳四疊前韻作

臺趙鳴九相邀見過 前詩既成復因壁君事

留影再疊前韻題 有可紀五六疊作贈

園居卽事次少梅贈詩 喬莘謂嫂氏徽懿宜與

韻答 老蓮合詠從之七疊

前韻作

作賀徐社長

攜金婚徵得各詩訪浮

贈慶育送其出使阿根

山共讀迷途而返作

廷

寄浮翁

二水吟贈幼衡

颶風步鍾槐村原韻

廖子厓十二年前在滬

題劉辛庵馬號集

被羈昨屈其日記詩

試武壽筵限貼梅月並

崇和次韻奉訊

步成韻

喬平八弟六十預作詩

王孝若寄示中秋對月

索醉並寄女姪書穎

之作次酬

美國傅示居美諸親

民聲日報社遷入新廈

眷戚屬

愉園詩集卷一

新會陳氏

閩縣李景堃次貢

讀荀子

經典重刊

東坡謂聖言切實皆可行荀子務高論過激而徇名末
流至李斯恣肆敢焚坑是或譏安石假託於荀卿讀書
考其說十九本六經第敢非二子謂善由偽生貽人以
口實動輒遭擊抨後儒為解釋庶得卿之情大醇而小
疵昌黎最持平

贈柯某之遼東參軍

寧從搏擊鷹不作啄蟻烏寧為附驥蠅不作腐肉蛆儒
生不合老牖下便當投筆事鞍馬我識吾子才我為天

下讀書哀我識吾子意要爲天下讀書一吐氣不然將
軍幕下集千賓那有儒生立足地君圖得當報知己我
於古人竊有比杜陵昔送高書記飢鷹未飽方側翅邊
城餘力可休師請問馬用窮荒爲杜陵又送顧八分辛
苦遠謫洪吉州崩騰繼肆戎馬際請君勸勉東諸侯賦
詩斷章有當不

哭陳公荆

我從石遺師黌舍初執經洎師歸故山乃始識公荆邈
逅酒座中以意度姓名肖師在微尚非辨貌與聲詩腴
人則瘦欲淡官自輕佐師脫千稿下筆氣崢嶸哀哉此
便已君書有未成

壽夭原不常公荆無死理聞聞歸洗腴往返輕萬里力
疾作家書猶自諱不起與父訣須臾不辭恐死俟命淺
親恩深言在無言裏生死操自天天有不可恃孝竟傷
其生何以勗為子

奔哭視吾師百慰無一可忍淚撫君兒乃僅離襁褓師
謂老而頑汝壯反不保百年人事長衰殘且負荷行挈
汝妻孥歸求汝遺稿文字有淵源人肯惜梨棗不朽在
令名何必爭壽考

陳能羣贈橄欖

橄欖生南方檳榔實伯仲藥籠所不收釘盤亦不中筠
簋致京洛如望橘柚貢秉性本炎升踰淮為苦降書生

值嚴寒刻意爐火擁咽喉遭急劫隱患輒創痛橄欖於
此時拳曲作時棟故人知我意壓裝遠致送開函實累
百爭奪兒童閤鄙懷頗自私茶餘備清供可醫甜滑詩
苦澀尤妙用物體無貴賤乘時便殊衆

次和陳繼庭同年留別之作

我亦當歸先送人故鄉南望隔兵塵去留同過倉皇日
憂患寧寬老大身附郭無田終失著橫流滿地孰知津
此生早被儒冠誤況是焚坑又一秦

疊前韻答繼庭

今日雌風直庶人壅然問巷起揚塵狂泉政恐淪通國
輟俗還憂犯戒身入耳鷓鴣連越井驚心杜宇喚天津

文章咀楚知何益獨恨無人解過秦

再疊答

愧對愉園作主人雙弓米盡便炊塵能詩無處投行卷
換醉何妨捨告身枯蠹依書如共命渴蝸守舍奈無津
今朝邸報分明在見說商於又入秦

呈黃石孫先生

直臣不見容斥逐如棄婦及其出臨民民懷若慈母枉
尺而直尋朝廷亦何負先生居諫垣遭時惑五斗幾先
陳禍福天幸免災咎再擊觸權貴遂換青綬綬徽州號
難治六邑半盜藪政成移青齊碑在路人口郡國今為
墟人心刻賢守我觀鼎革初官賤如窮狗脾睨舊使君

寧復知誰某惟公愛青民能知獨否否移家來寓公郭
屋結鄰右出門無一車扶杖兩腳走父老環起居兒童
隨拍手如此官與民晚近直爲有我來京國初值公去
朝後獲交諸後昆文字得諍友名父有是兒應愧陳堯
叟洗腆顏自朱不須到臍酒

贈劉孟純

披書對古人胸中輒有儼游俠定多髯理學親如毀因
思古循吏定似子劉子慈祥溢天庭民瘼刻臍理此面
可假借不敢復相士昔送君之官主僕一行李歸裝復
何如壓擔循聲起當年同舍生與君較仕履自顧太瘦
寒不能福百里守拙但坐曹詩囚竊自比豈知遁於詩

過君旗復靡君詩如長筵酒炙示豪侈我詩嚴選客素
心有二簋攢眉苦入社得句任臧否官職與詩名讓君
成兩美

滄趣師重宴鹿鳴賦呈

立朝至三公登峰造極處我聞凌頂談不在濟勝具中
途雖小蹟畜力得暫駐當其暫駐時神已層巔注辨誠
攀日月艱危不改趣雲霧至玉成堅我不回顧望嶽無
決心絕頂非所語

薄植關芳華一洩不可再新榮非舊榮絢春桃李輩惟
有豐年禾再熟史偶載是得陰陽和荒旱寧可漑在人
亦有然齒髮功成退黃髮與兒齒為天所篤愛讀易驗

天心貞下有元在

藥石必苦口已病在一時使人忘為藥終身可服之吾
師有良磁病汝自忌醫對面詔一語令人百日恩卅年
游師門敢云聞道遲自省寡過未俯仰慙恩私一塵增
泰山欲報愧甚微

送張雲蔚南歸

昌黎送師服詩託猛虎諷勉其取金紫勿久戀家弄君
歸就我商心腸為聚訟喪亂歸誠佳破箴脫飢鳳政恐
入裸俗衣冠會駭衆歸計君已決片言我且貢懷寶外
有耀人或知汝用行藏須自操羽毛要珍重衣食事則
小心志不可降并州猶故鄉吟沫待汝共

次韻郭乾廬年丈詠折枝詩之作

詩文變體古恒有齊梁散行變排偶古體變律律變絕
折枝吟從律剪取體別鶴頂及蜂腰吟費錦心鬪繡口
限畧嵌字雖束縛熟極游刃能無厚對仗燕雀要均平
不以塗澤分美醜規矩可與巧不能籍湜之徒僵且走
傳聞承平郭中丞詩人來種武昌柳郵筒馬遞騰宣南
緘句封題寄僚友碎錦盡收雪鴻篇句法留為後生牖
壺天笙鶴非善選坊肆災梨規剋藪晉安風雅文肅繼
馬江壇坫猶其後光宣之際蘇與杭樹幟東南兩賢守
何平齋文守蘇卓芝南文郡齋燈燭恒徹宵不論初三
守旅時兩郡齋皆有吟集與下九都人初尚擊鉢吟息爭下策竟割斗
林畏廬師喜嫚罵諸

詩老輟吟以避其鋒族改吟折枝焉

西社再結已滄桑月泉吟侶半耆蒿

城南自為文字飲那管世間賤舅狗佳句誰拾貯錦囊

積稿奚容覆醬甌匏廬摘叟集晚出大作海內傳鈔久

緒餘能辦急就章箇中尤推斷輪手門戶伊誰敢雌黃

無亦固哉之高叟

同時他社頗有門戶派別之見

廣渠門外奠七第

一棺拋殯舍地僻我來稀人世猶憂餓泉臺那免飢酒

漿沾絮薄盤饌裏荷微欲去逡巡久因風起累欬

示遂兒五十韻

淵明詩責子昌黎詩示兒古人於兒子厚責原深期我
年三十二是汝墜地時汝雖不甚慧猶有常兒資稍長

乃好弄如天馬不羈上樹騎屋山築球與捉迷凡諸嬉
戲事不教能優為惟有對書卷畏之如虎罷好懶成天
性過不在母師汝師亦善教汝母非過慈我雖為官忙
亦嘗自教之勉汝生愧悔不忍夏楚施悔心偶一萌修
又神遠馳欺凌徧第妹嗔責疲童廝去年送入學屢屢
犯學規今年我解官膏火愁無貲令汝就里塾近家免
遠離汝久便生厭棄之欲如遺晏起過晨暮早歸未午
炊如此號讀書欺人徒自欺願汝長辨才兼有好客儀
祝佞與宋美吾聞之仲尼苟能善用之可喜合時宜苟
卿非相篇勗人文學治歷舉古聖賢生非美好姿堯舜
參眸子孔子如蒙俱臯陶貌削爪周公身斷葛闕天面

無膚傳說如植鱗紱紉生美好國亡身為縻鄉里儇薄
子美麗衣服奇婦人願夫之處女欲與私俄則犯大辟
束手歸有司及其呼天時後悔亦已遲是皆荀子言陳
篇猶在斯汝今蹈習俗面藥而口脂修短爭衣服瑣細
較履綦須知好服飾蒙馬以虎皮不值識者笑慘綠將
炫誰日夜望汝改忽忽及今茲我初鮮積蓄門戶强支
持祇恐後繼難全家當苦飢汝母為汝憂玄髮變絲絲
我近腰不仁自知日就衰望汝早樹立為我興門楣汝
弟幸能讀稍稍為展眉汝能更遷善無官我不悲為父
良不易生子汝自知汝質非下愚如何不可移因思古
人言動人惟有詩作此以示汝意盡淚交頤讀之不感

勳汝誠不可醫

武德將軍歌

宣南下窪古北邙下簇白骨上白楊六月積潦水中央
荻芽出水如挿秧鄉人尚義慨以慷歛錢囊骨還故鄉
陰蟲食骹土花荒骹骹或得骹骷亡鴉鋤下及將軍藏
武德泐石碑煌煌年號莫稽干支詳

碑詳庚子年於得通州癸卯葬此

勿故國銜恤悲新王將軍之骨八尺長將軍之貌定堂
堂聞之取用宏多魂魄強精誠貫骨骨堅剛乃令風水
螻蟻不能傷我思將軍之死定戰場不然一刀一馬胡
在旁刀雖鏽澀猶鋒鏖馬骨魁偉亦駿良想見持刀騎
馬殺強梁如神騎虎來驅羊勝負兵家或未防人馬箭

下俱受創碧血凝碧黃土黃

崇陵感作

江山破碎一邱存何處
鵲聲帝子魂終勝東華營薄樸
倉皇昇向貴妃園

海內同聲痛鼎湖宮中鵲夢讖終符
普陀梁格還千里
相見黃泉事有無

戢戢松釵滿翠微因風吹動萬年枝
龍鱗未化黃泥圻
知是梁髯淚盡時

一自虞廷遜位初歲時猶奠玉田祖
野人那解官家事
獨怪今年遣祭虛

題元遺山詩後

有金文章衰趙楊宗匠手遺山稱後起造詣更雄厚夫
宣生幽并勁氣有秉受足以醫嬭嬰暨儒僵且走後人
摘複句搜癥肆刮垢遺山有何獨文字
間搜癥肆刮垢句更指芳華曲狎
褻失詩教美人香草辭離騷十八九放翁複句多古人
有科臼大醇而小疵何獨遺山咎平生論金元文采無
其右縱蒙崔碑恥大節終不朽我手遺山詩心折匏廬
叟閉門集成句遣懷一百首

滄趣師八十賜壽賦呈

初日矇矓浴滄溟一星作作為啟明三竿欲上且未上
忽然風雨天晦冥豈知雲霧只在天半耳上界日星猶
光晶玉皇早朝御前殿列仙齊集羅雲輦翠葆香爐迎

法駕羽衣星帔啟丹楹至尊垂拱如山嶽安期羨門列
侍皆公卿帝詢下界之人紀則有奎宿奏事伏階楹稱
臣無狀忝作文章之主宰今者下界文字遭劫甚秦嬴
聖賢道息異端起賓興禮墜不如告朔之餼牲臣欲表
章一耆宿使之繼美前歲廣鹿鳴藉以殿最一代之科
名帝俞奎宿題其議南極老人杖履上殿聲鏗宏稱臣
註生重勸光古者帝王降尊於老更乃今世人反其道
皆如漢武重後生遂使殷墟頑民與義士名利為重鬻
鬚輕臣稽海內一大老文章道德足為薄俗型願帝錫
之以修齡長與山下曾孫宴慢亭帝使使者咨三台三
台之長黃帝之師名廣成再拜使者復帝命謂有有媯

之後某石實足旌斯人世德襲簪纓髻黻文章長老驚
十八隨賦貢帝京廿一策對揚大廷春秋乘軺秉玉衡
愧死天下主司盲木天輪對聞直聲天恩雨露忽雷霆
靈修不悟長佩蘅養親鄉里託授經無何晏駕傷大行
嗣王天縱代藩迎搜訪遺佚及巖高優詔特起對邇英
節旄才畀撫幽并旋以經筵尊桓榮意謂剝極老而亨
修羅大劫隨而萌金人辭漢下露莖君臣遁荒影隨形
九陵寒食夢冬青花開花落春王正留命拭眼俟河清
皇天后土鑒臣誠世間有此貞復貞願帝旌之以彰明
德馨帝聞三台言傳呼殿下備使令乃命諸仙真統率
百神靈擔荷鹿胎酒烹調石髓羹朱籐九節杖靈藥千

歲苓丹書吉祥字紫茸鳳皇翎更命法部樂隨從諸工
伶吹簫秦弄玉抱簧許飛瓊崑溪伶倫笛緱山子晉笙
珍寶委積法曲清泠來至人間太傅庭予歎漢家官儀
之復覩帝所鈞天之得聆不勝誠歡誠忤折脅而屏營
退而訪西蜀卜者嚴君平問吾師過去之夙因與未來
之前程告曰爾師乃上界謫降之星精方今天未厭亂
興戈兵宜乎都人白晝見長庚他時天地還清寧請君
回望啟明星

曾仙舟贈近代詩鈔代東謝

嗜好如君異殷勤識我貧千篇虛挿架百輩欲燒薪新
體官蛙閑清辭窮狗陳眼前師友在吾敢薄今人

和繼庭登高之作

如此風波不可行
塵襟依舊客春明
新亭誰雪江山涕
淝水驚聞草木兵
百輩登高聊復爾
老夫閉戶不勝情
非關人事非耽寂
髣髴還應避後生

題董小宛病榻圖

捲袖鈔詩伴茗甌
十年清福信前修
螢芝一傳從頭讀
結穴緣何諱病由

細數金閨見面時
堆床藥裏强支持
病痕定寫何年事
只有巢民獨自知

哭陳佗庵

秋八月四日是我初度
辰家人治湯餅久待日加申寧

知出避壽翻來親死人中年失哀樂見死不悲辛獨於
君收場強抑還沾巾方君發解初豪氣驚鬼神風流動
人賞紅粉爭獻顰妻妾與子女嬉飽樂天倫廿年積憂
患骨肉化灰塵飢驅摩燕闕子身餘一貧降志事後生
所遭還迹邇煎熬宜早衰窮愁含死因哀哉君文采未
信終埋湮

師命治君喪開篋得補服不能入質庫所以還在櫛堂
堂階四品使君著就木遭時毀衣冠殮此良不辱悲君
死在客客死庸非福使君死故鄉還少朋友哭一諾死
前負不能為推轂乃令不擇枝受此無形毒過時未收
殮停尸待瞑目乃教君雛孫手撫而口祝君目旋就瞑

益信君死確平生千意氣一棺作收束晨霜日影微送
殯人五六到寺草草祭雜陳酒與肉生人各歸家拋君

在權屋

閩人謂殯所曰權屋

卓君庸招集自青榭分韻得開字

青山如佳人麗質不自媒往往幽勝地蓬蒿甘湮埋茲
邱鄰玉泉過客首重回卓侯動真賞唾手百金諧亦不
事華構三椽巖之隈種柳不遮山移松防破苔改徑避
新笋理畦鋤舊茨山下偶得泉激灑天光開呼船恣拍
浮意遠天無涯佇望感慨多城闕生煙霾淀園幾興廢
昆湖餘劫灰樂此暫塵外主客清樽陪坦懷對造物魚
鳥無嫌猜我尤默有念主人真賢哉在家雙翠軒深餐

循南垓出郭自青榭佳日侍奉來悅親取徑別青翠娛
老懷

題唐代二娘子家書墨蹟

紅粉成灰後難磨字裏香隔年思骨肉一紙話家常持
節隨夫壻裁綾寄阿孃料知緘淚日腸斷鏡臺旁

以近作就正許疑庵與談詩有得

閉戶學為詩冥行而適植苦索期得途所造仍向壁我
詩病淺露近稍學鞭辟矜捷與貪多為祟奪定力袖詩
造大雅餘明巧一隙多君眼如炬一覩洞癥結妍媸無
逃形鏡不假顏色君所首肯句果我辛苦得小善不苟
揚不揚便是抑

肅揖坐甫定開口便談詩處茲不談詩有何可談資詩
為我所癖口為我所私談詩人癡我不談我更癡海藏
示詩訣內腴外枯之聲脯味勝肉耐嚼而多脂食笋才
徑寸中孕百尺姿格物助詩理君聞定解頤拚當食筍
脯以為詩之醫

用韻和黃嘿園游抱冰堂見懷之作

詩人出國門長安變枯槁愴荒特自謚輸人過江早疑
君已高騫書來仍潦倒同命共吟沫死前約相保久聚
視等閒別後思彌好無家許得朋冥冥有公道南皮遺
構在資君恣探討當年抱冰情無人喻此老幕下名士
多誰此吐懷抱石遺與海藏履迹應未掃

長至夜不眠枕上作

盡道今宵漏最長不眠真覺倍尋常黃紬被底安心卧
會見漫漫放曙光

至日涉園

風帽凌晨涉小園
涇陰積雪滿林根
一陽萌動無消息
籬角潛行驗草痕

聖死

聖死其如大盜何
黷宮轉眼長蓬科
已開委鬼生祠漸
應愧同州酒務多

五代時同州酒務吏請斤資修孔子廟判官書一絕句於牘後來二句云

若教酒務修夫子我作儒官
亦太難見五代史馮道傳註
羊廢明年虛告朔鳳衰舉

國發狂歌因時無取尊王義為底山陵葬趙伎

初嘗黃河鯉

貧賤恥累人，瑣細沉口腹。聞客說河鯉，忍饒想彌酷。吾
女勤為致，蘆芑紫鱗簇。生意還躍然，校人若可畜。以意
儼腹腴，鯖鮓可奴僕。黃河天上來，種或天上育。何時大
風雨，隨風落九曲。吹沫為波濤，身自網罟觸。登盤芼薑
豉，濁酒不及漉。書生菜園肚，頓飯侈奇福。有客昔我遺，
眇小非其族。真品在眼前，一洗虛聲辱。江河尤物多，河
豚亦足錄。食鯉莫食豚，食豚內有毒。

閒居述愉園三十韻

未富先潤屋，吾計似頗疏。既貧尚死守，旁人休笑迂。我
本為奉母，乃構此室廬。中間為養堂，其左挈第居右邊。

六七間聚處妻與孥一室會賓客一室藏圖書西南開
小園結亭把茅誅胸中洩不平疊石為崎嶇一覽忌便
盡闢徑故迴紆繳水流入池聽泉了無殊樹蔭期速成
多種柳與榆為冬作顏色植松三兩株惟梅下地難所
以還闕如花開自桃李計至芙蓉枯中間六七月好花
無時無碧萼與紅葉秋色亦不辜十年自灌溉轉做幾
轆轤夏日一短榻樹下恒著吾花潤吾汗竭花蟲吾不
痛與花作奴僕體勞神更舒近來筋力衰高低就荒蕪
猶督小兒女習勤為掃除補籬未容緩扶亭留後圖有
客來獻策不如待賈沽可為衣食資兼省間架租達哉
樂天翁賣宅良非愚顧我有老母念此愉園愉昨才誓

花神相守志不渝區區戀三宿儒者非浮屠

十一月十五夜待月

卻為當頭著意看虛堂延佇二更殘只爭頃刻過亭午
吹散浮雲事大難

典大理院舊牘

卅載鮎魚上竹竿當時意興已闌珊不圖老女仍行嫁
也報家人去上官末劫不教燒法律書生卻慣守叢殘
欲窺廷尉平何事近有人來盜廟環

紀夢

晴窓卧領水仙香恰恰爐眉韻沸湯一晌聲聞齊入夢
單衣吹雨坐蓮塘

哭範廬年丈

世事紛成虧大可例墜甌惟有矢人範嗟悼無時竟突
聞公之薨驚駭幾失性昭昭非夢境白日顯可證憂時
煎肺肝為患甚疾病祈死遂夙志神游若乘輿萬劫有
時復公生不可更

辛苦成實略淚痕多於字世變更紛乘積憂滿天地心
同陵瓦碎眼送地宮閉魂魄依冬青冬青為損翠行朝
分豆粥委曲營奠絲易名猶具文人心有美謚國初三

大儒泉下待把臂

公曾疏請顧亭林王船山
黃梨洲三先生從祀聖廟

人未至中歲不知愛老成老成所可寶隨在皆典型哭
公各有感贊公同一聲公忘世有詐不自知為誠學問

與記誦翻書無其精在公復何憾壽考與命名茫茫者
天意何薄待後生

前輩惠後進齒牙足提挈論士恒及吾知公見愛切聞
者代感知身受不必說欲待吹上天忽爾風刀歆我誠
罹百艱所遇必挫折磨礱一把淚無地可發淚哭公策
自哭有聲九天徹

和方策六苦寒

虛齋驗氣候硯水真成冰爐火不及遠鉞坐如癡蠅欲
竟寫讀功瑟縮病未能慰眼見紅馱微暖分書燈烈風
號庭樹窓隙起而磨聲寒助意寒觸物皆生積

曉衾不敢戀有形同自役驅車過海子宿雪留殘白獨

憐冰上人鑿塊忙窖積不恤四體僵為人謀夏適使非
汝利賴箋天涸早圻耐冷吾性具敝裘況存草為有卧
路旁皮骨風刀襲

贈高蔭甫

中年記力衰事久愈模糊如燭之於影燭遠影欲無蔭
甫初應官取別至吾廬我隨伯兄後章素陪華裾挂眼
猶約略君神清而癯再面乃不識問姓審里居朱顏不
停改刻刻生少殊況隔卅餘年無鬚而有鬚執君以例
我君亦不識余所喜爾我心相質猶如初

病榻口占

盈虛消息自家知小極年年若應期記取舊時行藥地

剛剛驚老燕肥時

病最關心是阿孃幾回問訊出高堂朝來減食雙弓米
夜靜添燒一炷香

閨人解意置瓶花旋擘黃柑又注茶洗手羹湯無箇事
坐吾枕畔誦南華

枕邊數卷後村詩損目勞神恐未宜總為飢驅廢吟誦
病中不補更何時

苦雨謠

積陰不可破三光遂用晦勢猛山嶽移餘銳猶破塊允
旱患尚紆陸沈憂卽屆方始期為霖旣濫斯致害放霖
不敢必所望能少殺霽蒸化氣騰天汗如金蓋金蓋復

釜中循環無時艾我有桑土謀屋瓦嗟易碎一罅若尾閭平地成溝澮暖席果大難一夕移床再晚來晚簷角微陽弄晴態疏蟬達耳久請聽彌可愛敢憎聞聞蛙鏡汝一時快

次林子有新居落成之什韻

凋殘城闕劫灰餘似此長安不可居君自見幾規小隱我猶拙計守吾廬萍踪早悟身如寄花事難忘手自鋤差喜兵塵同未及朱門數去幾盈虛

執贄當年謁淀園荒莊百感過師門

贄虞師為子丁未座主時在軍機假

海淀某園為行卿子有其冢嗣也

素心已卜陶公宅盛德難招屈子魂

可喜避囂隔塵境儘容晞髮就朝暾閉門且自談忠孝

於世無求道益尊

張蟹虞導觀蜂場感賦

儒者生計拙餓死不足奇奪食於蜂口有得亦可悲婦孺識蜂性與蜂無猜疑導游入其域偉此衆戴之君臣世所垢其義乃在茲似懲無君創此為其子遺古謂人師蜂天澤起朝儀今則各有是人事不必師張侯飼汝心寧利汝蜜脾繁生固可喜奪食須防微

諱日供饋適石遺師書至告省志孝義傳刻成祭不能豐養更愆百端追悔亦徒然弟兄三地同今日涕淚終天又一年孤露所償惟母健親師以外更誰憐中原欲告無佳朕默喻還須費九泉

大都求米售佳傳誰氏題碑無愧辭仕不方州難父顯
生多清德怕人知里閭月旦能輕許叔季綱常最足危
何但闡幽秉勵俗矜嚴下筆想吾師

蕭謙中移居卽次其近作韻調之

治生苟簡無悔尤筆硯以外皆贅疣移家諸具一車了
奚童並載如輕舟雖然眼前非突兀秋風茅葢當無憂
咫尺廠肆境幽闌朝夕有得隨所求昨甫經過留我飯
咄嗟下箸羅珍羞隔房重幃深深下中疑有女名莫愁
豈知子春正求偶鴛鴦待闕陳衾裯嗟君耽畫絕塵事
長日如為山所囚百年短促貴適意有慕吾當為塞修
可堪春寒孤館閉能道此苦惟少游

林莘奮六十賦贈並送其歸里

百年過生日如客經郵亭既到例須醉明日還長征我
已近五十後君能幾程未來必歷境皆君夙曾經棘刺
滿君衣前路知非平君已動歸計我胡勤夜行同是客
中客相送若為情儒巾衆所棄讀書低放聲

嘿園於書攤得王荊公詩四葉以綴其案頭殘
本適合出示索賦

讀書不至破與未讀何異既破補而讀乃知書中味破
至不可補便讀於無字黃侯擁破書詔人以勤肄胸中
有其全補綴近多事荊公實式憑假手拾散墜貨居人
不奇錢買衆所棄乃知無無用乘時便兩利我愧黃侯

多插架若新置未飽蠹魚腹一瓚或可冀

歸途賃車感作

役人如牛馬膠輪為車攻我安坐而行彼以行當傭無
形之奔走車中將毋同天既予汝足汝亦哭途窮健者
身手誇哀哉此疲癯推挽來何奇一童復一翁翁駝目
且瞽父子為駝蛩官骸如我全隨盲稚西東此臂不當
折吾命非三公平生慄朽馭到門心猶忡

欲雪

盛雪固可喜一洩無餘蘊既晴景宜人欣賞惜時短惟
有未雪頃神味彌隽永美人隔簾幙在若現若隱久聞
百事廢因雪起我懶恐寒辨天色庭前數往返頗疑舊

長安人煙有餘暖望穿霰初集踟躕乃挂眼今日雪情
別佳處在一緩平生坐遲鈍赴事每太晚賞心獨不後
夫豈於雪但看雲貪初起看月愛未滿

小集第六齋中依韻和策六兼寄疑庵

喪亂失羣雁飛鳴暫相依嘉會不可常寸心未嘗違當
筵盛談藝唾地生珠璣飲和勝頌酒寧假巨觥飛萍合
信有天疇能知其幾獨惜行者至居者尋復歸

宰平甫
北返梅

史尋還
故鄉

溯與叔重別文字飲遂稀燈前減一影銀焰翻

無輝有約及花時來趁春江肥珍重勿羈留轉眼又炎
威

陳伯南寄書云昨夢與余煮茗談詩醒得一絕

惜園詩集卷一
索和賦應

朋友夢乃見契濶從可知得夢可自由與子永夜期君
夢能見我惜我不見而人雅夢自清茗事尤相宜風泉
石鼎旁同坐更有誰理亂閉口慣神遇惟談詩知君素
嫉俗在夢猶矜持招邀乃及我何德辱見思有興約再
夢茶具余當攜第恐有真覲夢中還自疑

星士陳某為余算年命感作

年命如長卷不必閱至竟佳處猶庸庸入後難更勝首
尾異結構於意似未稱五十當富貴恥與翁子競模稜
非所長聰明為世病已誤墜地初賦此冷峭性決咎無
可逃夢曰辛未應天或存折補好色無妄媵以此例辰

運不死未可定君自發天倪吾且安吾命

過周補廬丈老牆根舊居因懷周松孫及葉肖韓張珍午二師皆遞居此屋者

宣南坊巷古韋杜盛日朝簪此聚處第宅推遷有掌故名士舊居典可數牆根老屋足秋氣宜與詩人蔽風雨

補廬叔姪繼穉惜

肖韓師

知稼

珍午師

開山作初祖四人三

者皆諫官秋氣特多固其所如皋

松孫曾宰如皋

雖非諫官儔

憤時往往與俗忤庭樹槎枒如其人輪囷勢可雪霜拒丈人已徙門榜存昨我經過費延佇巢痕雖掃易辯認諫草焚灰未化土洛邑九鼎尚當遷何況朝官一門戶彭宣曾此侍後堂獨歎文章負期許心上之人屋上烏

門生頭白不如汝

霸州河

霸州河泥沙閱歲虛濬淘兩岸窪陷中央高行人驅車
不用涉蘆汀蓼渚生蓬蒿峻堤崩塌似殘堵望若雉堞
環長濠周侯補廬丈禹功天欲試故使艱險當官遭風雷

一夕決天漢州民聞之神鬼號使君登堤事捍禦號召
村夫驅里豪是時河身猶龜坼天邊忽報來銀濤薪樵
急施不容餒要與馮夷爭勝標浪頭分勢來掃岸有如
魯縞逢并刀蚍蜉蟻穴足敗事堤上萬命如鴻毛使君
誓死不肯去拚欲漂骨殉爾曹精誠感物在俄頃改道
水去流滔滔四封食惠出意外轅門拜謝擔竿烹使君

正言告父老天幸屢邀難卒逃綢繆未雨庶有芻勿待
年亡方補牢水衡之錢吾與請汝等畚鍤毋辭勞渠成
人稱周公落清泠一派恒平槽人冢堤南望堤北夕陽
待渡呼輕舸桃花汎過子魚熟平添春水三兩篙江南
風景尚其次霸州從此無旱澇

除夕

殘臘今日盡今復及夜半汲井餘寸綆撥灰刺星炭曉
鐘未動前歲華且把玩天行終古健疾徐因人判我初
鮮歡娛胡日亦易晏問年四十強猶可中歲亂公然到
五十諱老應顏汗燈光猶去年人影歲暗換送客登坡
陀容我回頭看歲去不留痕奈何真徒喚

...

...

...

...

...

...

...

...

...

...

...

愉園詩集卷二

閩縣李景璧次貢

上巳水榭禊集拈花字

改曆昧節序及時驗風花杏紅重三近料量知不差違
俗存禊辰何恤非笑加貪此林竹美而無管絃譚識字
本不祥祓除事皆賒緬想永和年北伐方盛誇蘭亭一
涯水臨文寓歎嗟俯仰動千載相尋多覆車今雖北伐
成四海未一家

侍滄趣師賜臺看杏花

愛山無伴餐勝稀看花有約遠敢辭賜臺夢想積廿載
暮春乃獲從吾師地偏未易探風信準以鄰樹疑來遲

山靈排日餉游客向背故有先後時胡園管嶺及方盛
前導見詔寧吾欺登岡俯視霞匝地稍遠淡白煙霏微
初疑此山定秀澤磊砢顧產瓊瑤姿石為花裹石亦媚
花或避石隨參差北梅之稱肖在韻況與鄧尉爭夥頤
明歲戒游要略早兼可入寺看辛夷

贈董李友丈

四十未出山旋踵至方面君子有所蓄俟時方豹變士
非艱歷試何由獲表見間聞賈軍實萬險伺一便驚人
在此鳴允矣大府薦至今酒後談聞者猶肉顫

朝命不卽拜首著在迎養母重官可輕茲事已足尚推
愛及孤姪教誡先志向知公真學問致力倫紀上寢饋

正誼篇躬行不多讓邢臺有父風雲天高義仗長君雖

邢臺余平叔之
長維繼經紀之

稱善易失實溢美反厚誣但得一心折足抵百面諛三

塘推首功異口而同符農桑諸興草在公特緒餘異邦

來觀光數為昔所無獨惜幕下彥著吾為濫等

家世人有集聲始於秦州吟香手稿在詩教知有由吟香

室吟草君詩
暢太夫人著養生無他訣大藥不外求陶情文字中隨

在與天游衣鉢賭棋莊公為謝牧如山
長入室弟子私淑滄趣樓經

師拜人師向來得天優

和鄭邁菴生日自歎

赤子湖初生號咷入母懷先哭而後笑似訴生可哀反

長昧性靈禍患相應來三萬六千場一場堪一嘆生日
詩自歎賢者真達哉吾儒罕言命不信角張乖頗疑活
人多神鬼生疑猜不然好為詩觸怒天忌才棄置勿復
道勤進手中杯

玉蘭歎

有女有女出勾欄素衣棘裙梳雲鬟桃花夫人寡言笑
號國朝天惟素顏上蔡游俠子千金來買歡買歡未遂
買愁歎問之無言淚汎瀾道懷良家子母死骨未寒桐
皮三尺以為棺欲殯不得欲葬難中夜跪父前欲言聲
先吞兒生十九年無足報母恩何惜兒一身成母三尺
墳非兒生不貞無奈家述道貧家一舉措向來難兩全

貞孝孰得失兒心已熟權請父備喪車明日棺出門麻
衣辭母靈兒貞猶自完三日上母墳女貞花剗根但求
母骨安兒身拚推殘客言甜似蜜兒聞心如剗纏頭紅
錦千萬端不敵吾母輶前三尺之魂旛嚙臂恩情如山
嶽不及吾母埋骨之土饅我聞此語鼻為酸不平恨事
來如山貞淫只爭貧富間包羞往往出錦團教坊時或
有心肝不信請觀王玉蘭

贈蔡星符

兒生氣不凡為母教不易縱性類助長違性防害志星
符才跡弛孰範使就器高堂有聖善順成功若地蓬麻
不同科初生實相類各得地之養長成判榮瘁我初懶

讀書費母千斛淚壯仕名不顯三釜虛未備撫躬重自責負母豈一二別後愧對君進德益瑩粹昌黎喻猪龍其我兩人謂蹉跎勿復言辦取尊前醉看君身上衣增我春暉慨

同林牧庵丈何梅叟陪滄趣師游香山

城中鬱蒸如釜甑結念山游坐風磴雨後泉佳月正圓師可吾言起乘興翠微足迹畧已遍較量往往各有勝香山水石獨擅奇璇題雙清的可證腳力預養戒明發先辦近游趁未暝老枯如霜望倍明墜泉無風彌可聽東峯缺處日出早人與風禽競先醒盞輿歇側避厂石路絕松梢別得徑遺構僅餘見心齋擇地停筇此最稱

玉泉經過未挈瓶不然折洗堪攜贈山水多取不傷廉
紅葉再來約預定

客某歸自大連喜晤賦贈

故人飽憂患過海看沈陸尺書落中土恐為筆札辱朝
市況大更謂肯輕投足沈機祇自喻西笑忽有觸幡然
附賈舶歸攜海山綠相見語萬千不談意更毒驅車共
出門有訣惟閉目傾耳聽市喧中有無聲哭液池謀小
坐悽絕認前躅把晤歡有餘惜別意潛伏此行料稱意
翠微遂信宿西山如未忘後游還當續

西陵八景圖為陳向元題

山川闕品題佳處罕見省一旦遇好事萬口傳勝景西

陵本禹穴巖壑況秀挺陳侯選勝得為圖寫嵐影不必
境親厯顧名識其梗由來諸鎮將多行殺風景陵樹推
為薪殿瓦拾換餅海內山皆殘一隅獨完整月明神出
游恍惚聽傳警父老想入非翠華望來幸

程育庭同年以所著說文籀古篇見贈賦謝並
乞舊著九朝律考

讀書貴識字古訓聞之熟字中可讀書此秘君所獨許
氏文九千日夕勤畫腹會心黃虞初了了見其俗考工
與儀禮若為此書續好古考殷墟轉覺取徑曲荆公創
字說無茲舉證確世謂文字死是人不善讀鬼哭見書
工多事亟徙屋

育庭舊居有鬼
為祟近甫卜遷

飢來欲就君分我天上

粟九朝律更來効鬼尤所欲

送內姪陶煥民往日本奈良教授

邪世聞書聲難如釣天夢子來破岑寂餉我以吟諷士
風不可返於今更積重湮磨不溜磷楚咻失其衆荀卿
志游學家貧乏賣送工師偏汝遺拳曲繩墨中求學須
聲氣言之至可痛槃槃璠璣才行矣為晉用奈良山水
佳宜汝對吟誦何時賦歸來一窓風雨共

女夫陳任襄挈秀穎及外孫避難來平卽送任

襄回鄭州

一夫奮大欲亂已九州遍鄭為所必爭禍發被兵先汝
輩突如前固知有急變敵愚取下策飛車以應戰藉曰

有殺傷何解民命賤盜賊非人情時或與人便使非賊
驅汝山嶽奚汝面兩雄不易決此地終較善時定送爾
孥吾且溯清汴

寄陳吉廬

臨別不我辭既別書不至無補於會合楮墨誠可棄我
輩交以神寄書各寄意吾意所欲宣君應悉之備君之
意中書我能揣其字上言眠食佳下言不得志

無罪

為蒲子雅作

言有必不聽與虎說無罪爪牙未即加意若有所待虎
去衆張守未脫終汝殆揭皮已見骨疑肉別有在肉在
罪不輕無肉罪當倍人有生少因此理虎未解聞虎頗

自命能為觸邪勇大抵所謂邪人中之模楷

哭林若卿

天刑赦不死一足先就木

此若卿病腿曾削一足此用其自嘲詩原句

埋足已

可悲今更身莫贖當時忍百痛換此殘生促留命何所得多見海變陸最神君一杖所至病平復微疾不自起醫經枉用讀生才萬千難鬼手祇反覆昨旣死君女於意如未足必使五日内父女死相續閻羅聞未聞兩家生人哭

離別去死近往往無見期亂後數同曹已死多不知意外得數面爾我天所私啣沫約相保所望誠甚微微願且不遂無怪百事違朋友死喪多難得值一悲眼枯欲

恐淚奪眶而交頤過存始聞疾永訣卽此時當時能早料吾胡急歸為遺稿收生前慰君有佳兒

酬策六

詩成隔日讀疵累恆滿紙今日所謂非皆昨甚自喜明日使更讀安知不復爾朋友非至直誰肯輕臧否求師於明日得師無窮已君詩有捷才捷非率之比我惟不自信問影亦虛已一詩無百字棄句或倍蓰拋擲千艱辛旣成平平耳百嘗味不變好詩要如水

湯山旅館題壁

地上出泉溫山名以湯揭泉達山數里甚矣山假竊吾人能潔已何虞有緇洙奔車衝塵坐不如不浴潔我初

為好奇來探燭龍穴世比堯年寒泉幸不改節或云有
丹砂未見砂一屑三歎欲問泉源自何時熱本性應甚
冷為味定甘冽因熱以自誤遂為人狎褻溫波惠池荷
湯山池荷花時特早不足供茗啜無垢亦無病泉於我虛設

過伯南廡齋邀蔭甫共談

寒暑非外襲由心生者半至人且喪我何有寒暑患潛
庵發其秘逃暑託揮翰濡首於墨池不辨墨與汗庸我
入客座素紙尚鋪案主人襟袖清涼氣如未散我初不
學書痛恨無好腕別有寄心法五言無間斷得意世可
忘外熱何足算心靜涼自生二理原一貫隔牆邀高叟
為我一評判高叟誠更高北窓忘昏旦

題陳蕤衷所著燕京叢考

萬物至脆弱人情喜變遷故都如墜甌未墜已非全持
較光宣前寧止墮垣穿市廛與巷陌無一非海田為政
務粉飾長技惟改弦孤埋而孤捐作計尤可憐陳侯錄
夢餘忍淚成茲編委曲避時諱稱都冠以燕書成筆暫
停境異成書前順承非舊觀宣武門原名順承門今已墜御河行就
湮御河橋已填塞築路君書所不及續考當何年

次和伯南苦熱

季冬餘寒送一牛立秋閏熱十八虎

立秋後餘熱加虎俗謂之十八頭老

虎日十八以日數計也

今年虎似倍尋常正坐三伏久不雨望雲

落點滴勺水沃焦釜痴龍情厭職潛身入水府熬波海

欲乾坐受黑烏侮玉女虛投壺雷公失引鼓鄧林葉盡
槁道死渴夸父三椽足自庇夏畦我猶愈富兒爾何物
程鄭齊遷虜涼幔張廣除密室覆層廡晝伏而夜動如
鼠竊倉庾陰房暗白日未死與鬼伍我屋須三光不與
換百堵迎薰常開軒貪月不閉戶日落鳴蟬疏風停流
螢聚以此永朝夕未覺熱可苦揮汗拜路塵久已賤隸
圉

贈林碩田

伏波及貴盛平生思少游元獻規景文齋飯思本州兄

弟並稱賢趣向有不侔長公誠高明

惠亭規模宏
大碩田長兄

君尤

得天優微尚薄利祿沉潛為素修我老樂為弟似勝君

一籌壯歲慕紛華頗貽兄長憂從君學歛退謬託臭味
投問年生同月癡長良自羞君得五十年我失五十秋
從來語得失有大於是不晚學其庶幾政恐易白頭

游大連有贈

垂老作新夢乘興破浪游解維意飛越故人已在眸滄
海別廿年再見仍橫流平生圖南意杯芥聊自酬披襟
藉宣鬱渴肺容有瘳填胸唾乃快與水添一漚連島時
挂眼根鬣如雕鏤潮痕高過檣變淺能無憂中原落日
外星影明枕樓胡越各入夢離合同此舟千辛換一聚
明日海東頭

賢者勇避世擇地恒加偏居島意未已必極海之壖獨

占一灣碕稍前波際天散礁未入水殘陸餘幾幾填海
著此閣可謂無地焉閣外勢益險閣上卧愈堅聚石種
青松根與珊瑚連石髮吹上牆補蘿疑可牽我來為逃
暑蒲簟久棄捐數帆作日課聽濤損夜眠潮來雖定時
終恐變成田主人改栽桑不失為神仙

題爰居閣

竝海數近景石礁宜稱尤黝作鼎彝色頑鐵非其儔負
戴露背鼉出沒浮鼻牛當時定崩巖迹象猶可求烈日
積歊災已焦猶未休

舊楞嚴經文字品大海有石其名曰焦衆流沃之至石皆竭礁或本

隹字本意來看潮足乃為石留再至日未饜枕上時補游

洛園奇僵多得一似此不隔海如可致不惜聯千舟

黑

石礁

大連與旅順一島分西東海口各門戶腹背遙相通連
山去蜿蜒百里青蔥龍坦途謝顛播展盡車窓中攬勝
此創見山海競獻工出谷聞崩濤車下方舂撞一轉又
聳翠拱揖羅羣峰路絕再逾洞想見五丁功過市知戾
止表裏猶稱雄當時此夜壑大力來何從表忠塔轟天
嗟我船司空

表忠塔日人記
念日俄之役

秦人滅六國督亢先入關東鄰巧謀我觸目心更寒為
圖盡廣室半壁連三韓風俗及物產以類羅千間掩飾
事考古金石紛斑斕人腊信有之何取亦不刪

有古尸
四唐高

昌國人
西陽雅俎
李章武家有腊

厥初定薄葬地風吹使乾眼鼻已

陷斜膚草猶粗完並世遇古人窺見唐衣冠我來真似

夢汝夢或未聞容有臭腐時其如我不官 旅順博物館

客語虎灘勝未至先推測似虎未必然名或因險得臨

行始往探意外有奇獲夾車兩岫盡入海懸峭壁展屏

立鏡上斬若巨斧劈不謂溟渤勢涯渙乃爾窄隔岸可

跨橋每人此待汐

地有待
汐橋

逾岡如裏湖孤山為遮隔割

水作數面此景山有力平心論奇詭黑礁非其敵 老虎

灘

八月望後偕黃嘿園葉杰三泛舟八里臺

秋水雖淺舟堪擎析津所恨皆泥窪水西舊莊不復覓
得此誠足稱清嘉嘿翁前游詩示我祖船六月曾攜家
讀詩好景已到眼眼見彌信詩非誇甫及水次境界別

澄漪林樾陰交加夾船河房遞自獻闌楯差可齊枕牙
暑涼及料盛招致非時還喜無喧譁水村漁聚望已渺
極目遠水惟葉葭一程非通語佳勝岸既能曲灣多又
山游論屐水論艇南北艇制殊等差總宜舊制失綺麗
瓜皮苦小宜自刻廣舷雙槳此僅見枕席坐卧無闌遮
此船此景四時可能來靡必看荷花

星符奉諱南歸追送不及補詩為別

南人盡歸南修門罕有入途遇識面稀離索久已習喜
君肯北來共此涸轍濕言歡才幾時慘聞皋魚泣強慰
難為辭言別更悵悵侵晨霧漫天出郭追送急後先失
半晷執袂已無及我輩交自堅不在臨分揖古人交誼

薄始有盟車笠

陳仲起姻丈出示新詩倒次贈什一首韻答

丈人少許可非分得寵賁盲瞽使審音有作輒出示賤
子晚學詩略得詩大意詩好從苦吟如夢先熟寐語貴
自己語字必詩中字大雅如玄酒平淡為至味君莫厭
平淡此境不易致鈍根鮮妙悟學古失彊記鷹鵠對鳳
麟徒見其獷鷩努力學為山老至尚平地

落葉四首和嘿園

草草收場又一遭西風吹汝下亭皋殘秋斷送非無據
小劫焚燒不可逃植薄故應歸宿早世寒要戒借枝高
池萍乾死猶粘塊根蒂如何自不牢

渭水長流去不還無邊蕭瑟滿長安溝中只合拚為斷
天下同時聞一乾烈士可勝遲暮感丈夫肯信掃除難
羣飛任是猖狂甚豈解人間有歲寒

吳宮花草憶樵蘇踐踏秋痕滿地蕪製餅內家如樣否
題紅怨女有詩無料量短髻應同秃檢點吟腸與並枯
欲向將軍問消息年時雨露恐終辜

烏銜蠹蝕費低回生意祇餘未化灰丹橘江南從得氣
白榆天上讓無灾昔時蔭好誰相憶萬事功成總可哀
莫道邱園終寂寞雪中邂逅有花開

贈莊思緘院長

十年久坐曹閔官如傳舍朝甫慶登庸暮卽免冠謝誰

如莊毘陵中朝屹嵩華在已既無競於人思寇借憶昔

領郡年巨眼脫臧霸恩私置度外寧復計斥罷

公領郡時黨人

某走避郡齋公匿之旋助脫險以是去官

故鄉畫錦開父老節鉞透焚香默

告天一廉矢暮夜旋入長烏臺風骨達官怕神姦竊大
位左右使貪詐選舉用市道公然日諧價危言悚禍福
呼號聲至嗟不幸言竟中人以前知訖朝事嘿不談閉
門樂插架耽禪沈文靖嚮書鄭興化興來就蘭若松杉
結僧夏賓筵佐笋豉綠酒新出醉我醉發狂言恐遭官
長罵

以蒸羊饋林梅南樓以此詩

饋歲與賀正禮失趨勢利窮巷守家臘掃轍寡投刺君

乃歲必至雅人徇俗例展敬必申說以我母在侍從知
君子賢動即贈錫類昨復占系願伴來蒸豚饋疑是吳
姬能欲顯割烹技開函述夢母命餉此膈臂事亡如事
存不忍已死視一壺至尋常漸感幾出涕地下茅母賢
猶具殺難意孺慕兒可憐隨願見夢寐節候集可羹未
敢以為遺荆妻學斷慈報君一羊哉

陳伯稼仲經少奇昆仲述母德乞詩

一士憤時政慷慨東海蹈

張兄不

嚴君作宰暗不媚竈

與與被讒傷其生知命却請禱如此名父子乃為天所
媚斯時賴聖善諸兒得履熏教養戒喫咻成材期遠到
師資難自秘世以宣文號遊班湘竹林女學更深造

某長湘有女校宏願持一殺退休敢卽告功成謝邦人飲水以
自勞少奇奉母來導輿側其帽不才百無似母健足相
傲天倫不可廢時論任顛倒

陳兼與之武昌賦贈並簡嘿園

失官何況味出門少一車尚饒空疏腹日添盈寸書予
齒而去角天原有乘除食字如可飽誓當守故廬吾黨
圍城中談藝時相於由今想圍城猶是黃虞初君抱磊
落才郎署辜遠圖此行莫萬一猶勝淹故都武昌魚大
佳建業水不如興來黃鵠磯官醞亦可沽倘遇雙井翁
為道音問疏明日不出送政怕西風汗

兼與寄示游抱水堂詩次和並寄嘿園

滔天巨浸懔懷裏半壁支撐想此堂祈死老臣憂及溺
傷行舉國坐迷陽劫餘遺像應無恙君等清游定勝常
莫問城南龍樹院老兵占作試弓場

龍爪槐張祠近恒
駐兵往年與筆與

社集恒
假此

擬寒山詩

今生所親愛輪迴如不迷其事甚可悲隔世猶生離所
以孟婆湯中具大慈悲無論冤與親一概不使知
誰家起大冢神道碑栽栽伐石一尺厚刻字無偏頗功
德不入人字深一指多拽上別人冢再深也要磨
昨過一暴發衣服都且華將身作衣棺只要人人誇恨
不并四時裘上更著紗頗聞是人母天寒無衣遮

城中一道場僧俗作普度磨麵炊饅頭剪紙作衣褲道
有一餓丐飽暖不得與施鬼不施人鬼為人所懼

生兒不自養責乃乳媼加乳媼無人心兒啼毒手撻勸
婦且勿怒作計汝自差是人能愛子不會至汝家
珠玉不能語認識由乎人天與人兩眼只知別富貧魚
目混真珠玻璃裝八珍飾上富婦首雖假亦成真

世有一文士著意求名聲同類則標榜異已則相輕唱
酬必名士序跋必公卿公卿百歲後與汝同無名
昨有良醫師告我攝生學謂言世間病多由貪口腹有
飽死侏儒無餓死方朔所以醫富兒必用川厚樸
五十而置妾送行猶遠哉六十而置妾為汝洗離杯七

十而置妾挂帆人已來岸上抵死留船上抵死催
楊布衣白出犬吠其緇歸今時犬更慧只吠藍縷衣哀
哉人無行犬性隨而移狐裘而狗鳴犬見偏依依
人生一百年不能長少壯少年笑我老我老何多讓多
見舊規模少見新花樣新上更有新汝亦趕不上

愉園詩集卷三

閩縣李景璧次貢

南行雜詩

母在不遠游有方夙猶病飢驅迫卒哭此行實誰命妻
孥不易割舍別無較勝女持湖汴詩要我踐以應適越
而西行故合執拗性少時輕離家未省母淚逆今日辭
几筵九原不遠聽客途離人事哀樂把不定車動罪彌
天居廬未能竟

車行一日程及午渡黃流勞歌此分手

與林

吾程

止鄭州嫁女六七年今始壻家留聚棉役千大機軸日

夜抽

壻任家為婦
織麻拔師

要孥一疋布衣被天下謀女知我憂

舊邊多時出游河底吹上天黃塵遮遠眸野徑連入城
人家聚荒邱未知鄭南門鬪蛇休未休

到漢盛雪後暄暖至可異減衣出覓伴渡江風正利水
枯沙步遠春動江流膩武昌城作岸拾級要數憩黃鶴
樓改觀仙歸定唾棄地靈依附多星卜挾鬼智不祥身
喪母寧肯叩趨避官胡祠何許抱冰猶美謚樹人初應
悔酬恩至易世

晴川

晴川閣

快先睹舟人語以指聳翼矯若飛凌虛下無
址盤徑始得達磯危不受履橫江欲騁目東西疲回視
剪水面其曲憑闌可千里一木支此世賴唐固其理世
人重壯麗吾意殊不爾正如逢佳士敝褐亦可喜移閣

入吾詩要亦不易紀

舍舟緣大別駕言琴臺尋圖畫落眼前路盡及湖潯曲
堤通遙渚亭榭依小岑徇人以求知牙終役於琴穴焉
尚仰秣人罕知其心山水不易喻琴理況淵深後世動
賞多崇臺斯至今宋歌已漫滅汪銘苔蘚侵祇餘門外
水泠泠有道音

黃公渚至都約同出游晚宿冒鶴亭腐齋明游
後湖並登清涼山

朋友尚氣類吸引若針芥勝游吾輩事隨地可傾蓋豁
蒙豁蒙已有取況近古同泰憑闌恣眺賞湖光上襟帶
儒生餓不死臺城登奚碍風流慕辱井後主故可愛無

家如挂單食宿隨所在主人促下榻無枕抽書代文藝
久閉口聯床吐乃快玄武辨續游拏舟破朝靄櫻光遠
迎眸幽尋得意外橫陳久嚼蠟看花一破戒指似清涼
山要酬行腳債詩禪儼有髮此僧容不拜縛帚乞收度
無地可掃穢茗淡別意濃好景成默對暑月盧家湖勿
負後游再

棲霞讚佛二首有序

攝山千佛殿佛有殘者歲辛酉日本益田玉成來
游潛奉觀音佛首歸國頂禮甚虔越三年東京地
震四鄰灰燼益田所居獨完感夢令送還山遂丐
其友鈴木增太郎代奉上頌又佛首三丁卯歲為

淀橋町栢木蜀岡所竊感夢同翌年郵送歸寺林
壁如院長素奉佛發願足成身相告成日子幸與
法筵及聞靈異敬讚

攝山懸秀巖齊梁此禪窟椎鑿萬檀施頌石現千佛金

剛亦有壞肢體或殘闕賈胡寧淨滿取首至唐突

六祖入塔

後新羅僧金大悲遺淨滿來取首見壇經如來貴遺身人偏喜迎骨矯揉事

頂檀雖敬總近褻但辦一片誠已足大劫脫苦心示靈
感眾生難棒喝慈悲泯冤親所為稱菩薩

大覺至圓通故山乃有戀西歸失舊龕退僧共一院林

侯善護念佛拭香花為琢磨補戒體衣衾必考研

石刻衣褶

必倣六朝舊樣修補六朝工像塑今人亦雅擅天然狀悲憫石紋

儼皴面心中母卽佛金身記曾見

去歲侍母疾假寐驚覺見東壁畫軸忽幻

佛像自是信佛

法筵與聽梵獻花許借便念母及百回轉經未

一遍

舊識某於秦淮牽船為宅重五招飲次韻酬

年來流轉似飄蓬此地重逢豈意中短髻照波同見白
衰顏得酒暫教紅一船烟水供浮宅六代江山老寓公
在客可驚惟節物又看楚粽賣筠筒

江春筠約游雞鳴寺卽次其韻

鍾山拔地挺菟萼覆舟居城亦不惡雞埭迹滅換高岡
一寺據巔際雲脚寡泉鮮石誠刺憾回環亦自抱巖壑
六朝佳麗在何許欲訊古人不可作景陽遺址及三閣

僅可冥思費摸索當時君臣盡兒戲興廢迅若風掃籬
九錫禪詔遞鈔襲四史陳陳盡當削東海鯉魚飛上天
崛強江淮計尤錯父子未容分兩家枉遣徐鉉騁舌鏑
江山無恙人物改憑闌同此送日落登臨不作斧柯想
兩袖間任閒却齋餘疏磬送下山暮靄依微掩林薄

三月余歸北平伯南已南來及再至南京伯南
先數日旋里旣而余游杭州歸伯南復過此
北上三度相失承寄示游玄武湖詩次和

天池溟渤九萬里十斛之舟只一葦狂欲航之驅六鼉
踢翻東海五山峙書生異想旣不遂鬱鬱久居寧樂此
秣陵山水重玄武魏晉以來盛載紀南朝曾此練舟師

元嘉中有黑龍起後世淤積失不治高者田廬低沼沚

五洲佳名各有舊徒取紛更識者鄙

湖中五洲今改名歐亞美澳非等

佛視世界若微塵莊喻天地取一指寓言則可泥則鑒

我自會心有真美平生痼疾在澗壑廿載杭州足未履

南北兩峯忽挂眼一棹西溪進邈迤茲游得再不自信

當日固疑在夢裏聞君西湖已動興裏足不前卻為底

能來同飲虎跑泉定教抹殺建業水人生百事每中阻

刻意引商反變徵來途去路惜錯過失我眼中陳玉几

不然以詩當會獵未信南皮孰難雉不然就君看落筆

槃礴從容解醜髒緒餘更乞肘後方活我吳民戴白死

千里重逢未敢必良覲三虛近盈咫他時願學孟與韓

上下雲龍逐吾子

西湖二首

理安

理安松楠勝陰森不可迫四時無晴雨濕翠恒欲滴據
亭自科跣筋骸恣一適景幽物性異禽鳥無躁翼竟日
不逢僧想見山之寂物外冥心久單衣涼不敵出林又
一天驕陽正炎赫

水樂洞

陰洞如寒等一腔兩其竅潛行蟻入穴邐迤達奧窅忽
聞金石聲如毀魯恭廟驚疑欲卻走導者幸見詔為樂
至於斯顧名初不料其故不可得亟以火來照奔泉走

地底回響臻此妙太古直至今所彈只一調

送林仲立歸長福建檢察署並寄碩田

南來無所得得朋至可喜窮旅慰荒獨實惟二三子
從速早交獨君後二紀尚可償久聚得失畧相抵仕官
非本心國人肯舍爾但求行直道不恤官左徙君於父
母邦已三為司理當時所全活瘡痍尚餘幾遺黎望神
君庶幾可免死文忠舊德在歸培喬蔭美秦淮舊詩盟
更誰執牛耳

策六書告遼事甚悉附寄一詩以質直見許詩

以答之

漢末天下亂視遼為樂土幼安生今日稅駕亦無所往

時竊自計避亂於有取予季旣足依郎君亦可主敵強
狡思逞邊帥壞吾圉生靈十數州同日齊陷虜大東神
所遣

宋儒方履之之子名大東策六之子亦名東

早歸慰老父我受憂國煎

更兼憶弟苦

詩以寫性情愛好亦一病不求盡人賞但取自吟詠後
世更無憑傳非我為政新體方囂張古風未可競閉門
互攻錯狂言乃動聽失人恐滋戾質直況吾性不圖沽
瀚韓乃喜拘囚孟

同吉廬及陳巖孫游京口

北固論形勢久以險要著自吳迄南朝代遣重兵戍鐵
甕已屢破未可恃為固梁武更其名名實始相副豈惟

望直北兼宜左右顧在山但言山勝處已無數隔江況
非他詩人之瓜步烟波遠櫓人急節被留住風流幕海
嶽附會鄙甘露自從削方杖寺僧俗如故北固

六朝多高僧恒在江之南此地誰卓錫儼可稱名藍不
必定多竹疏篁間修楠崇墉杜外景禪關原戒貪欲考
開山年碑記不可探寺多祖師塔庭駐南巡驂寺齡猜
樹圍量帶有及三我留聽梵音堂頭初晚參幡幢濕巔
翠鐘魚破曉嵐僧儀有恒教儒修良自慙竹林寺

歸途至金山水村已暮靄江心儼平陸海田憂垂屋勝
游坐匆促舒望聊一快登塔追黃昏稍縱卽不逮向來
論江景六時夕為最霞生暝烟合瞬息變萬態奇觀例

難并寧可舍玉帶摸暗趨中冷既見益嗟怪濁流混混
中伏此清一派淘江滌舊眼太守緬遺愛

中冷泉已湮塞吾鄉王可

莊先生守京江時
覓得重加疏濬

金山

儒生真途窮江行逆風遭焦山如未至食蟹遺其螯賈
勇同登舟忠信輕波濤附載得兩僧佛力倘可叨進尺
而退咫浪頭如檣高長年竭智力畢施漿與篙來船掠
舷過遇順風吹毛波臣會擇肥孱軀無脂膏大溜在北
岸畢濟未可操勇退本夙心飛廉爾徒勞

焦山阻風

同陳虛谷夙之幾士雞鳴寺登高送幾士趨覲
客子情懷易變騷端居多感況登高他鄉骨肉分三處
今歲頭顱見二毛頗謂重陽宜此地本來秋氣屬吾曹

兩兄苦挽能無動知為趨庭夢寐勞

題紫霞洞

留侯圯上師黃石誠意山中拜紫霞
願怪古來王者佐
彌天事業託仙家

贈林放庵丈

立朝至不幸被許謂明哲一身得元咎
禍中搢紳烈戊
戎急功輩正坐一字熱當時騰薦章公意自不屑收骨

哀晚翠

林敏谷先生

語及輒嗚咽立儲議置傳有勸主知結

飾辭以遠患毋亦鑒前轍世間無疾風焉知有勁節

庚子

立大阿哥有薦丈入傳者丈以資淺辭

黃屋非本心遜政古無有遺黎下首陽往往用藉口公

若稍貶節疆圻可唾手鄉校且卻聘寧肯喪所守先人
闕謚典臣子負疚久焚黃告先隴沒齒感高厚行險圖
邀功公意獨否否疏逃論忠愛不在近臣後

舉世習唯阿無欲剛則見公每發莊論聞者輒色變胸
中無滯著此訣養生便前身定放翁證取七薌扇海內
名士多公能識之編論詩少許可於我每稱善聲價敢
自長詩人世所賤已居公歸年飢驅尚塵面

公閱驛得
改七薌畫

一樹梅花一放翁扇園中放
翁與公逼宵晚遂自號放庵

謁散原先生廬山

不徒句法照瀛寰人品當儕魏晉間世有能詩俱望斗
我如禮佛遂朝山心馳窮島憂孤注

與談大目飲晴嵐
連近事

當大還願附再傳弟子列師門疇敢抗曾顏

先生為滄
越師門生

登五老峯放歌

堯舜巡狩首山過親見五老來涉河殷周以降暴易暴
五老走避茲山阿精魂歷劫誓相保化作巖石爭嵯峨
埋雲未肯露真面戴雪或見鬚眉皤古人至者千百輩
望洋雲海嗟奈何山靈喜我展誠敬窮冬故遣風日和
潛行辨徑自山後面衝或恐遭譏訶緣肩踏背據其頂
身與蟣蝨同么麼千尋一俯瞰到地似從巾幘窺裳褱
崢嶸崩石亦奇峭或如墜劍疑遺珂冥心面勢審山理
峻拔何乃無偏頗罔巖博厚作後倚崖岸與衆殊殊科
氈椎楮墨所不到山亦與我同軼軻鄱湖化酒浮金波

醉倒山頭狂放謔欲遣五丁加砮磨天池作硯嵐丸螺
雲絮縛筆休用呵倚天奮腕書擘窠行行磊落銘征倭
持較浯溪知孰多

出游遇雲海至三疊泉望泉不見在巖上煮茗
進食雲久不散

千山收霧情嵐斜出游辦取三疊泉迴崖沓嶂換登降
倏爾奇境生眼前我身何時落窮島目之所觸皆海壖
波濤洶湧接天際島嶼棋布紛孤懸崩漸汨沒儼盈耳
移情幾欲從成連向來觀海駭濁浪今則失訝同鋪棉
審知海為雲所幻杖底華確仍山巔茲行恨未縛竹帚
竹簾廬山竹葉泉影不見聲空傳得嘗清甘亦不負盈
細謂之掃雲帚

甌汲就巖頭煎滄溟一勺助汝漲樵採枯卉噓青烟揚
塵邂逅可三見料此衣狗尋變遷崇朝不散疑凍合杖
策再至知何年

辛未除夕居廬山次東坡岐下寄子由韻

平生志疏食蘿鹽取自佐山中固不陋歲闌足百貨毛
栗地所產香甜惜不大未敢餉詩老贅詩造林卧袖詩
原先生媵以袖底雲長揖入客座茗香潑澗雪餌軟出家
磨更辱錫大集百朋不是過明當獻新什下里敢索和
饋歲

臘底逢大建猶得一日遲今年小除夕歲逝便莫追在
家已黯然今況羈天涯家人昔別我情緒如此時盛雪

負夙約忍辜筍蕨肥

散原先生招飲以雪大承赴

釀錢陳杯盤後飲

能勿悲不徒歲當別山且從此辭兵塵高過雲能令游興衰別歲

門外已進狼門內猶鬪蛇扶眼看此世垂曉期可遮殘更剩一刻不眠能幾何後生得藉口擣蒲窓喧譁風窓燭易跋街鼓知幾過日月車走坂垂老坂益斜平生五閱辛未來仍蹉跎壯歲不可常年少休矜誇守歲

元夕在鄭州過別族弟濟川及穗妹堅留一醉作此示之

事有倒果翻成因避亂乃遂修睦嫻入鄭依女非始料惠連況肯來相親諗知有妹亦居此姑姪門宇猶比鄰

年積罪戾有母復不保母血為子枯父形為兒槁遺墨
映身後有法非意造雅秀肖明人石師跋曾道病中右
腕廢漸乃書以左叶習能成天然易腕益娟好茲乃病
前筆蓋亦最後稿叢鈔出邸報憂時見懷抱宣統二年
夏月日猶可考我時入京師兄促游三島前事紛上心
一一增懊惱跋竟歸仲兄子孫世永寶

拔牙

舌柔幸不敝牙殘懸一車動搖礙咀嚼決去恒躊躇長
年醫菜根早枯由勤劬巨鉗容入口舊恩終覺辜長養
華池中竟先百骸枯既拔轉自悔乃師溫嶠愚嶠有齒疾拔之
忍人無不忍有母且絕裾律我奉遺體宣止傷髮膚

補齒

拔牙計大非補齒更可已未豁復奚礙落盡亦有止醫
師有利口足以佐其技諱老方自慙還童吾詎喜刻鵠
八口食換此編貝美朽樹著綵花徒飾外觀侈根深且
不保浮種無久理

宋人有種齒術

飲啄信有命溝瘡詎無齒

楔日集十剎海分韻得膺字

人物有代謝節序來如恒楔事祖風浴溱洧亦足徵後
人重逸少永和特見稱故都居人稀詩侶獨有增十剎
感劫反欲話無胡僧意愜坐近水流觴得未曾古人取
自適吾胡悲填膺用夷風尚殊斯文知孰承歲歲後不
祥禍患猶頻仍魚海春正融洗兵能未能

游華山

太華如蓮胡云哉吾疑得釋憑茲來峯尖攢簇辨仰聳
似蓮實似蓮半開連山周遭儼玉井千丈拔出知誰栽
翠微遙望歎陡險非險焉見山奇詎峯回徑轉抵絕壑
去路奚出方疑猜片巖脫裂若複壁巧於其縫饒千階
猱升掌蹠要並用去踵適接來肩頤天窗出穴更登峽
千尺幢盡處有穴曰天犁溝喘息躋雲臺更上經光君
窓出穴即登百尺峽犁溝而抵雲
臺未昏借榻負夕景預養腰腳蘇興僂晨興縛縻險敗
興宿霧填谷千山埋古人禱祝乃敢上興雲意外翻吾
諧古人至此恒禱祝昌黎痛哭別有為值得一死誰能
諧侯雲平乃敢上偕心平一石刺心自可質神鬼閭闔穩度憑坦懷倚天
平二字

一劍身走刃以喻龍嶺差無乖

蒼龍嶺至險昌黎投書即在是處

鐵鉅

牽挽託性命千仞脫手成枯骸造巔乃知小孕秀嵩岱

以儼猶俗胎長松盡含太古色一石未肯虛安排晚晴

媚客足吟眺真形畢露無纖埃亭亭玉女頭淨洗

玉女洗頭

並衣裳雲際搖鬟釵棋枰待月可忘睡

下棋盤在東峯

黃冠敗

興頻相催下山有約展嶽廟待考漢栢尋唐槐嶽宗乃

假鑄兵器殺氣已伏吾其回

歸游龍門

長安行未成西笑強自抑鋒車夕辭潼晨炊及洛邑游

客非應官

時遯都洛陽

勞歌取暫息水縮輿有梁沙軟步費

力微風麥浪颭輕車度阡陌伊闕已在望陵谷未更易

巖巖成佛窟，疇復知禹跡。隔水望香山，達人此窵窳。詩
魂許我接，以意讀墓石。歸途尋牡丹，春寒病猶勒。

陸丹林屬題紅樹室時賢書畫集

異代見推並世侮，今人焉必不如古。能明此意，世已罕。
前惟杜陵後介甫。杜有不薄今人句，荆公亦有畫堂拾
不惜萬黃金，苦逼今人不如古句。珍巧馥惠來者誰識，陸侯用心苦。
紅樹室中書畫禪，今日高僧未來祖。

命法院公役導游千佛山

廬雲袖初攬，華雨衫未浣。壯觀饜鼎食，培塿等一臠。濟
城望南山，聞勝起我懶。租驢挾一僦，出游詎無伴。石多
烟嵐足，松瘦針葉短。風軒俯城郭，明湖近可盥。單板隻

履影飛墜入茗碗登巔望來脈百里青不斷
泰岱衍北麓弩末猶精悍何當禮丈人孫曾已刮眼

游錦屏

尋山如尋詩取徑喜至狹向來絕探得恒在山之脇
龍洞溯溪入此意我已愜路轉徑益束錦屏見巖業層巔
絕人迹過鳥亦震懾劈疑巨靈斧赭受陸渾劫日月丐
精華雲霞與壤接屏成於鬼工錦亦新出篋草樹受渲
染未秋有紅葉霜天還更來一枕對六疊

龍洞

疊巖積億鐵載壓萬鈞重一罅胡獨遺不崩亦不墜
鞠躬試由竇鼓勇且率衆漸豁疑穹闕更縮入修弄蛟龍

舊所宅其說非鑿空哆口驚神奇舉足雖疑恐曲如蟻
穿珠困若鼉入甕冥行手代目司明失其用盡頭孰燃
燈分光來我共失笑光非他見天將出洞脫身自墟墓
是死抑是夢平生洞游多未見可伯仲

佛峪

好山貴得泉涓滴養萬綠佛峪足自傲有泉兼得瀑山
僧飲漱久胸次亦不俗出手作亭榭可當畫圖讀精舍
依厂巖廣稱厂之幅虛廊周其廓憑空基以築廊盡軒
磬折抱山故置曲一亭懸東際全圖此結束儻從對山
望裁錦束綠玉讀詩未肯信掩卷試閉目

龍洞歸途口號

錦屏認取豬巖紅
反映斜陽更不同
恰有歸鴉過陣陣
一鴉一影落屏中

一巖後却一巖前
嵐影遙看若比連
不是暮雲為襯託
前巖誰識是孤懸

有訣歸來路不迷
不隨山轉但隨溪
每逢斷卻山根路
踏過溪來便得蹊

人家占住白雲深
流水門前置一砧
一杵擣來成兩響
稍遲一響是回音

罷郵望家書不至

盼斷平安字
今朝日又斜
吾生偏作客
汝輩豈無家
以墨為消遣
惟燈聞歎嗟
要學應念我
何似在天涯

趵突泉

昔客建業飲水艱瓶擔符調來江干濟南名泉溢平地
飲水得飽兼奇觀趵突有幸處郊僻未被閹禁供大官
一泓噴湧日萬斛終歲騰踔驚翻瀾立如黑風吹大海
跳若激浪衝危灘玄冬不涸旱不竭已閱湯禱更堯寒
初疑潤下主巽順胡此違性同刁頑臨流一晌忽有悟
桑經酈註吾曾翻惟河與濟列四瀆往者無犯恒相安
黃流改道汶更注濟遂見奪名空存地中伏流茲乃出
卻與灤水開其源正如有媯國喪亂奔齊五世昌陳完
以水喻人至有似水有顯晦人何言

法院題壁

主人敬禮許優游不為明湖也合留此地重來如隔世
劉少溪為推事時予曾來訪 明年再徙定何州已拚一呖同吹劍欲
勸諸君恕竊鈎風送瑯璫偏入耳咨嗟斗室亦天囚

過藏泉樓閱王孟山房所藏古幣

上古幣用貝奸偽無由作後世鑄以銅錢遂有厚薄
莫謂形如刀鋒鈍不可割人死每不悟身被此刀殺
焚泉小如焚入手不可數不能天下人盡是河間女

帝鑄泉小如焚故名

新室重識緯忌漢之五銖白水興真人此錯誰鑄歟

以漢為卯金忌銖字金旁遂改鑄貨泉而貨泉二字雜之背白水真人識

序布作厚布傳寫成魯魚金石足證史其說良不虛

序布

漢書作
厚布

黃牛白其腹五銖在當復光武見事晚童謠却應蜀武

十六年以前尚用莽布
公孫述在蜀先復五銖

男錢佩宜男古人義有取梁武去肉好孔方有男女
武梁

鑄五銖去其肉
好謂之女錢

宣帝鑄六銖文似人又腰果不利縣官識者知錢妖
陳宣

帝鑄六銖篆書六中孚象人
又腰當時有不利縣官之言

開元進錢樣寶后爪一招以訛更傳訛遂謂妃指甲
元開

錢背有半月痕鄭度會粹謂進蠟樣時文德后招
一甲迹以訛傳訛有謂楊妃甲迹畫墁錄辨之

鑄泉第二手我誠愛道君崇寧通寶文楷法參八分
今古

以王莽為鑄錢第一手
宗為第二手文皆御書

命鑄泰昌錢民間有墜淚不恣死其父熹宗故曉事

熹宗

見天下多嘉靖萬曆錢命補鑄泰昌錢聞之有墜淚者熹宗命補鑄泰昌錢

聚錢逾千品此老非慢藏不信銅有臭時聞生古香

再至南京喜晤鶴亭賦贈

窮旅無室家朋友若性命相思輒命駕冒侯況所敬傾
談限文藝移晷未易罄各詳別後踪出詩互相證太華
絮羅浮吟情定孰勝我輩論出處貧也實非病章甫而

適越世論多未稱仕隱道不同夷惠各稱聖天爵足自

貴知君有至性手補聲山圖識痛佛天應

鶴亭聞聲得查聲山寫經

園以甘在不取藏後更求不一圖值一哭不必廣題詠

江南名園多水繪與拙政拙政屢易主水繪還舊姓

水繪

園近由鵲亭
斥鴳贖回

豈惟一家幸詩人額手慶寫經報母恩我
愧未能竟亦有先人廬無復往時盛觸事用自傷貢諛
實不佞

有答

石遺門下兩詩友韓門翱湜騰人口論詩取徑微不同
論才並世真無偶子愚才多豈篤論毛底從渠索癡垢
玉璫象拂不屑髭淡掃蛾眉視何有我如貧女傷晚嫁
荆布粗完不掩醜平生百事欠先著豈獨稱詩落人後
常侍五十詩可昌年齒衰遲不任咎才窮剩丐山水助
下筆嫌平喜險陡邇來更欲破天荒心馳域外九州九
贈言感子齒拙什益我蒼堅意良厚醜枝無花那望實

況責呈材到腐朽冥行植植師途人宣城況是吾低首

靜安寺路散步入市歸作

坦途如加髹風動無一塵行飯信大佳可惜車馬頻去
車機上梭銜尾恒轉轉上載醉生魄下繫枉死魂行道
少緩步居室多閉門行行漸入市造次憂失羣進止聽
街卒部勒嚴行軍高樓疑夾巖蔽虧天易昏暮色憧憧
中人禽難強分倚市笑卽哭登徒眉能言繁燈欲燒城
蒸氣生炎雲本來欲追涼何苦自煎薰急歸似逃死移
榻依前園茗甌以自犒蒲扇先策勳

題夏劍丞吹庵填詞圖

胸中景萬千腕底筆一枝丹青描寫窮畫意移爲詩此

老能事多一圖焉盡之長卷繪倚聲僅覩鱗之而昨訪
康橋居歎絕人地宜怪石得詩意鳴禽娛畫師柳歌隔
花簾儼讀清真詞主人明古音聞說足解頤手持所著
書聲韻辨入微劍丞著有古音通俗例證經傳師讀例證今韻析三種詞韻蛻唐
韻猶得正始遺通叶漸無制與古背道馳甚而遙叶江
歌麻曾不釐者卿未免俗江者卿通征衣詞本江韻未用遙字稼軒頗遭
譏稼軒諸作多後人韻喜寬藉此因有辭君能成韻書
詞律嚴可知願懸為針砭宏廣聲病醫

去思臺圖為向元題

此邦有去思在民為不幸胥溺久無告自分終滅頂舉
手非甚勞何乃無一拯陳侯職治軍豈但賊避境能於

洪濤中奪取舊廬井易民報使君楚甃倚層嶺飢渴元
易饜要亦民糗束寄語瓜代人登臨合猛省東西尚可
臺官賢民自肯

三十年留影合裝冊為葉沆辰題

天道十年一小變何況吾人之顏面毫釐之差旦暮積
攬鏡故吾不復見君燭此理始童仆遞歲留真及旣冠
編年正如一部史才自唐虞及秦漢又如風騷湖雅頌
貌雖不同神一貫他時敝面莫觀河且把此圖試回看

愉園詩集卷四

閩縣李景璧次貢

游新加坡動物園

蹠跡交國中見獵喜從獸
讀詩貴多識含生理宜究茲
園勝水族海濱適結構截堅樹
園柵分室置暗竇投羅網
馴野上下窮飛走我獨憐文禽
毛羽成自寇主人潔飲啄其意
非汝厚猛鷲銷殘威迴非在山
舊爪牙未忘搏耽耽度肥瘦想
當生擒初跳踉困猶鬪檻車來
絕域價等生王購金軀終汝怯
未肯自斷脰雞豚坐凡庸樊籠
得寬宥鳳麟非識時豈免在笊
圈

次徐伯良贈詩韻與之論詩並示林生

五言溯始自蘇李贈別河梁曠散擬南朝造句傷綺縠
敗素欺人作齊紫盛唐猶得國風遺六義能兼賦興比
閨詩晚出明始盛十子詞壇孰繼起投荒豈意得兩君
袖詩就我乞龍砥人師好為夙所戒下問多君獨不恥
由來詩學關性情耳熟徐生內行美伯良孝行鄉人恒能道之林子
秀句出寒餓一字欠工吟不已遣辭獨惜未換骨偶得
時能力透紙量才等是越尋丈優劣未容絜尺咫先生
酒食輒自愧感子用匏兼執豕作詩惡捷戒貪多適可
難能要知止閉戶自精勝求師好辭盡在六經裏

除夕感作

南邊四閱月葛衣觸焦熱不信冬將闌還謂夏當結春

物紛上市詔客至清切蠟炬粗於臂桃符殷似血翻曆
推朔望殘臘無一瞥奉母五十年守歲如一轍母死事
顛倒豈但遠離別去年逢歲除廬頂坐看雪炎荒出意
料今年更奇絕椰汁斟屠蘇蔗竿代桃茆不獨天行殊
人事大差別合眼思家中辛盤例陳列免喪未附廟遺
客空增設作客似較勝在家更懷咽景緣情而生情易
隨景滅明日喘騎陽晴復知佳節

元旦遣筆

始滿才驚歲易凋何緣過二又勾銷國中政恐無明日
海外偏能記歲朝投刺相過非舊識寫詩自遣未無聊
此身自分為蓬梗不問他時甚處漂

題拒毒專著卷端

阿片藥籠物可以已風濕藥也其實莖可暫不可習耽
溺百事廢中產至不給初從海舶來屬禁久不戢迫種
更可殺計敵追科急花艷根至毒滲漏土中入沃壤成
硯田秋穫無一粒血肉甚於土未死宜骨立膏火燒成
灰汝脂口自吸蘆竹截作管汝骨手自執網縕氣如瘴
吐吞聲若泣猶懼不獲死引針注毒汁忍痛換片愉命
畢針亦澀滯除非無方自新晚猶及茲編當棒喝國人
當珍襲

觀舞

樓臺湧現此何所不是璇宮疑月府綠陰結帷草鋪茵

月下羣娃踏歌舞衣裳結束態楚楚步驟疾徐中律呂
散如飄墜五色花立部坐部錯參伍忽然一聚花合心

除卻柘枝無此譜

樂史綠衫偃身合戚花是
為柘枝舞有花心者是也

胡人合舞

取諧樂隸事間或徵諸古雖然分隊選齊容部頭定有
名妹主僊僊最數黃家女鬟髮新裝年十五國香自合
領羣芳花草蠻花何足數翩若鶩鴻騫遠渚霧縠雲綃
助飛舉輕盈一步生一搖頗訝君身乏腰脅凌虛更能
企踵行著地鞞尖無半黍胡旋勅勒未可非會心大可
例霓羽曲終不見客未饜繡幕雙垂掌猶鼓南來我詠
聞見多老眼此回歎未睹頗聞汝父斥千金一藝學成
六寒暑汝能足誇我之贈為作篇詩終汝許

游植物園

讀騷疏草木辨名歎良難況茲炎方植欲考無園官踰
淮有化枳當路疑非蘭若者櫻桃嘲若者修竹彈椰樹
如禿塵高出連林間棕櫚搖微風展扇舒且閒不信能
常青數枝已染丹勾萌與葎落一樹為循環寄生類何
多無根枝葉蕃生不識故土腐難還本山雨露仰所依
贅疣無久安愛汝非惡陰休假來盤桓故園有貞柯未
忘盟歲寒

新加坡雜詩

羣雄奕海上著子爭後先局勢忌不展孤子虞遠懸英
旣滅三印觴角無相連半島未到手高枕難安眠息刀

綰亞東土人自稱其地曰石區脫在海墻萊佛計已售

蘇丹愚可憐英印度公司代表萊佛士航海覓得新和

柔佛蘇丹購得土寸土今比金誰識開闢前二百十方

里三萬王面錢蘇丹誠未愚失地贏腰纏世有捐燕雲

拱手劫盜然

其二

萊佛骨已朽遺像餘精銅短髮禪兩肩綽有儒者風不

信荏弱夫域外能鑒空當時效未睹人無道其功天尤

忌陰謀帝聞難自通英倫困踣日不如一賤工萊佛士

裝兩巨船燭於海上因頓以終公道有不泯生嗇而死豐溝壑起餓魄

霄漢轟鬼雄甚矣慮始難中外大抵同萊佛尤自可萊

脫無酬庸

蔡脫聞檳榔嶼欲棄商為官英廷不許前督瑞典會著書論其事為之不平

其三

海碕走兩股如蟹張雙螯天然一軍港中可藏千艘是
亦要塞比稍近畿訶遭我來為上賓所見嗟皮毛列強
盟弭兵汝胡糜水曹益歎機事神能以器代勞關捩司
一夫畚鍤同桔槔港成會有時東方誠足豪為紅海以東第一軍
港象山今如何論議徒甚高發矢弓且無遑問弓之發

其四

諸夏國無主島人知有君此邦嘉會辰英皇渠帥大蒐
軍書生昧戎事一席壁上分土著無一兵免役豈汝恩
印卒故非弱國亡聲空吞奈何我健兒不自護本根為

人執矛戟非義勇奚論

華人自成義勇軍一隊歸英官管轄

當時破拿翁

軍容猶有存効死保夙譽億千國殤魂

英兵第二十營最稱

勦旅歷史三百餘年無役不提曾破拿破

廣武幸成名

茲事聞未聞

時國內亦盛稱其軍

其五

中國夙自豪聲教震百蠻獨遺柔佛國不列於理藩

柔佛

國在新加坡北過橋便入其境

何時隸英版虛號存蘇

丹我昨遊其都頗疑入槐安黃緣識儲貳範圍得徧觀

一櫛發秘局中藏漢衣冠云是先王日來自中國頌賦

先緒初雄猜任殖產府庫猶千間亡國有新術酣恭恣

所歡東鄰有效顰誰當語殷頑

其六

全歐戰五年勝負力俱竭列強問何得歲添一罌節

戰休

紀念日謂之罌花節命名原因以法國某村產此花休戰日正值花時盟軍軍於此罌花紅可憐

況漑國殤血海濱有歸骨貞珉早標揭

海濱立有陣亡將士紀念碑

英民歲致救賓座亦我設遺族不惡睹殘淚尚淒咽生

還同見招誇客臂斷折蟲沙入默禱天地返寂滅

禮拜堂祈

禱時鳴鐘為號市外羣動皆息

紅英若解語能道戰禍烈

是日稱獻佩綴皆用紅花

然聞東海頭移根復萌蘖

其七

五洲稟殊氣膚草色顯判世界彙民族茲島稱壯觀

新加坡

坡有世界人種場之稱

印度有皆種非盡黝如炭吉寧似瑣骨齊

智像羅漢

吉寧齊智
印度省名

土著馬留庵

土人稱為馬來人馬
來馬留一音之轉或

日馬援
所遺留

然否未敢斷居人四十萬華產逾强半喧賓主

所忌動輒遭遣竄

華民得罪驅逐回
國者日有所聞

不記開荒功筆路

揮血汗懸法科新來輸金許登岸

今歲一月起新
僑當納登岸稅羣羊

從一童馴服吁可歎

其八

海外賓萌多首數粵與閩粵閩派既分閩亦不相親郡
縣有疆界山川至不仁天上星野同人心生越秦對面
隔山嶽言語非其因我本四海家殊鄉猶比鄰況過郡
國士敬禮敢不均獲戾庶可免負咎良主臣二豪積不
能無力為調人平亭各有失不袒富與貧

胡某方盛
陳某中衰

贈徐翁李鈞翁為伯良尊人時方嬰疾

血氣乘乎剛粹發為貞疾天或憫早勅償以晚歲逸肢
體任偏廢聰明未易窒時事可不問憂來愛窮詰老人
損宵眠甚於巖疆失家人識此意掩飾雜虛實此老當
盛年氣概可從悉舉世溺科舉一衿棄不恤全家徙南
溟咄咄一枝筆卅年換桑海寧知有今日我來乏朋契
徐份交最密孝經效勝醫孝穆杖起必伯良業醫有至行

清明寄仲兄及諸弟今歲清明適達先慈冥誕前歲葬亦此日今年新

喪長嫂

往年綵服盡里骨未應灰丘嫂從兄更夜臺今歲紙錢添一碣
月老啼無淚除却天荒刻此哀

翻羨賓萌守墳墓子孫日暮隴頭回

張柳池喪女述夢蹟繪圖乞詩

浮生夢白晝死卽睡長夜奈何不自廣淚為兒女瀉讀
君殤女辭石人亦淚下令嫺澤詩書儉約屏蘭麝生卽
有仙氣聰明鬼所訝人間本游戲茲乃游戲罷欲塞父
母悲靈槎特遣迓地仙多巖樓上界盛臺榭煙火氣不
到以花代耕稼花為蝶之糧蝶亦仙所化女云願為蝶
此辭實假借司花理或然於神位不亞官府重職司四
時有休假骨肉情未忘雲車會再駕猶勝掌上珠持踵
遠方嫁

贈過客

記否軍中秘發喪奈何三矢父仇忘北門付汝誰亡牡

來路逢君有饋羊

所憾新自歐洲回

海水難量羞豈洗國人欲

殺論空狂長安涎涎休重唱公子如今不姓張

聞此行船上用

西人姓名登記

學泳

平生戒臨深水性慄至柔自從海壖居目日滄波謀意

謂水可狎海亦同池湫小試但濯足再進思川游技成

我其魚陸沈吾無憂有客施浴衣

放翁詩泉堂施浴衣

犢鼻身不

周裸露已瑟縮望洋更夷猶左右作我氣夾持黥挾囚

告我游泳術要訣先習浮心與水兩忘學彼鳬與鷗沒

腰漸及膏氣逆成喘牛客助我仰翻曝肚倒懸頭勉如

客所言亟將視聽收居然能滾波一壺無待求猛省身
所棲席浪而枕流詎知方寸搖平沈如漏舟波浪堆壓
身腥鹹嚙入喉歷險方知艱問敢更試不使我猶少年
茲事為應優老矣不若人此生恐其休

偶成

生性吾如柳季雲朝中消息久無聞何如說鬼猶風趣
聽話鍾山蔣子文

老嬾偏教應客頻門中車匠謔來真非關卿等名難記
沈謝吾曾論主賓

女慕男貪眷屬成姻緣大抵結多生如何寫就鴛鴦牒
却要閒官與主盟

疏盞葡萄酒幾巡上極遙集宴佳賓澄淵眼稱靈山鼻
彼美西方有美人

杯酒能令騎日醉碗茶便廢徹宵眠老來精力潛消退
無恠風懷減昔年

次韻答燕衷

遠客如半死又如出家然死可思慮泯僧恃戒定堅作
客俱不能悲來祇呼天牢愁驗髣髴髮玄者已變宣乞食
已得食豈敢云迤邐鼓腹換離散人事無兩全自著曼
胡衣章甫久棄捐觀海仍東流看天亦左旋四時若長
夏日月疑失躔地當歐亞衝道扼孔道咽送迎過客多
恒奪老懶眠無素強歡笑飾情悵離筵神戀歸國舟崖

送恒付延看客船解纜易如琴解絃奈何不自歸家室
眼中懸天刑甚桎梏無形成寧踐窮鬼尚未逐二豎潛
來前徐生樂甚驗我病自不痊向來刀圭術不能愈憂
煎內熱顧不汗六月猶擁棉病起口益饒葷羶徒垂涎
積贖待徐理塵雜未易蠲休假出行藥逃俗遠市屨平
生吾少游仰彼跼跼八第喬平書來道敵情先聲震
虛弦比屋走避胡第亦盡室遷老妻如病鶴離機思遠
寡觸暑馳長途羣雛扶一痛君能靜鎮物如魚守故淵
作詩被不祥吐辭故為妍正氣干雲霄直上掃狼煙陰
符書故存善讀無李筌及身胥溺憂暫塞猶涓涓城下
盟已成消息非浪傳正恐我歸日身化華表仙來日恍

大難心目徒惛惛

續新加坡雜詩 其九

夙聞南州富地上錢若流未知貧謂何但覺生易謀路

有飽死人家惟紅朽憂豈知三年來靈源成枯涸通年橡膠

販值新加坡市富者變為貧到官供自投取府特設報窮司掌華民

破產貧則不畏死得飽寧坐囚平生饑溺懷竊祿恒自羞

師儒效浮屠募化為束脩於汝倘有裨吾肯書疏頭為日

學校書募捐啟國中知未知毛盡羊當休國內時復攤派公債

其十

大連博物館駭絕看人腊今茲觀蠟人觸類憶疇昔象
塑馬來婦哺兒並紡織呼之疑可前如聞語凋晰豹死

皮可留人死留不得梟雄揭假面死欲後世識通替藥
防腐范金鑄冠幘智愚過掩鼻行道付歎息一例憐銅
駝會見在荆棘何如蠟造象尚有人嘖嘖

其十一

養生遵自然寒暖忌無節出治淬以水血肉究非鐵怪

哉矣方人激寒又何說

此間日須以冷水洗
體一次謂之冲凉

威陽似熾

炭脂臟煮滌血灌頂注冽泉不虞陰鬱結既久我亦習
甚理頗了澈捏雪與抱水初試寒凜冽拭手自摩撫反
覺炙可熱其熱非外來毛裏導之洩內熱我自防水淫
非好潔

其十二

古人直稱名老聃呼孔丘諱名而稱字後世俗已媮此
邦人質直古意猶有留子前父可名朋友夫奚尤五十
貧且賤稱官尤我羞名非生帶來偶合本不謀君子病
沒世不惜抵死求及身名自聞況能傳遐邇小名母所
呼未許人出喉舍此無忌諱任呼馬與牛

其十三

印僑產佛國竺教今消沈我欲問劫灰胡僧無處尋多
神教入主祔廟祠浸淫昨為迎賽期名曰大寶森輟業
空巷觀虛牝當萬金鼓樂導穉像輿仗堆蠻琛什百信
徒從殘體償願心禁制或有術創割焉能禁習聞大耳
兒肥已心計深縱肯為犧牲正直其汝歆

大寶森神印
度齊智人所

奉迎神之日信徒皆殘割身體以從齊智大耳工
心計俗以大耳子呼之不工不商惟以貨債為生

其十四

迎神無足觀烟火洵堪誇我強抑鄉思支眼娛歲華一
聲如春雷起陸騰金蛇霄漢火光盡化作千瓊花頗疑
補天石磨屑娛女媧又如撒珠網入月擒妖蔓歎而纓
絡垂條變流蘇遮餘燼著天際欲闢參橫斜高臺涼露
深收視還歎嗟今夜夢何許定落城南窪

大寶壽節日恒在農曆元

夕後一日元夕北平南下窪鄉館烟火甚盛為都門八景之一

其十五

石鼓規船齋聽水寄微尚

滄趣師於閩江石鼓山唱水巖築舍像船形摩崖書聽水

二大卅年迹不到夢寐勞想望南來甫息裝陸居屋安

仰曾園假水榭闌楯儼船樣頗疑藏壑中大力移海上
否亦屋圖成借觀落巧匠後村詩亭成天下借圖看海行十日程驚
魂脫駭浪命中注飄泊位我此最當可惜舵艣具中流
不可放不然雖石腸小海猶能唱

花肆主人程薰南稍能吟以予久未過其肆寄
詩詢故次韻戲答

鰕生自歎乏清才不獨香奩讓次回只為桃花人面改
故教崔護不常來

聞遂兒死耗倉卒在龍山寺以前韻哭之三首
生子奚論才不才聖門鯉豈讓顏回早知別汝成今日
餓死猶佳不肯來

豈是龍宮欲借才如何豔相不饒回阿爺久蓄思家淚
野寺號咷爲汝來

稽首禪床禮辨才冤親叩罷話輪回廿年短夢何滋味
勸汝人間莫再來

再哭遂滋五首

哭汝已五日積淚及升許兩眼成淫霖朝晴暮復雨十
四汝妹信稍稍露端緒道汝溺遇救措辭至吞吐我即
知不祥十已猜四五主人早得耗未敢出莽鹵勸飲促
早睡晨餐待入肚乃知汝弟妹合謀瞞汝父一室天地
旋噉然虎中弩淚墨書汝靈入寺求哭所寺僧亦鄉人
能作解脫語其如方寸中一創被利斧汝生不信佛泥

汝聽魚鼓生西不敢必但求脫水府收淚撫汝靈明再
來哭汝

掘地引盜泉歛錢戲人命美之曰泳池實可諡陷阱官
長目無睹付彼僧為政兒故不喜飲生亦無內病滅頂
坐無救心讞我已定殺兒者非他主池楊其姓汝叔與
汝孀未能口舌勝寬洪主不較汝伯我所敬汝弟千里
歸提議大且正立碑永遺念兼可後來傲臨深我所戒

徇人亦試泳學泅不學溺詩讖竟汝應

予學泳詩初稿有世人不學溺

其初皆學泅句以語不祥刪却就

知竟成詩讖學泅不學溺見列子瀛臺汝所喜書聲尚

入聽

瀛臺在故宮南海遂兒賃此讀書

平日愛看水死所此或稱

在瀛

近臺左

其奈萬事休一棺四釘釘

我癖不畧兒羞作舐犢態汝少不喜讀督責無少貸憶
汝十二三一事違我戒我時若飲狂夏楚取其大汝啼
忽失聲疑中汝要害驚惶急撫汝仰天自怨艾汝乃反
問我父無捱肩背父子相抱哭覺汝天性在用愛自此
始從未出自喙旣長知折節持重識進退頽白作馬牛
每用此自快顧汝猶未知書來求我愛老父憂樂懷不
輕語汝輩欲剖吾肺肝示汝不可再榨我骨中汁酬汝
眼淚債

以我心如焚推識汝母悲前後將入雛卅二生汝瀝血
盡化為乳榮身無餘脂朝送汝出門暮不見汝歸聞耗
暈絕頃去死能幾希在家亦徒然不得撫汝屍其悲定

過我念遠兼哭兒書來作達觀行間多飾辭我亦道止
哭夫妻互相欺前月汝奉母避敵汝姊依攝影遠慰我
寄至才幾時汝立弟妹旁我疑彼為誰審視久乃識喜
汝別後肥誰知一旬後哭汝手再持夢中魂魄來吾今
能辨之

聞人哭其子恒勸善遣排今我境親歷才識味苦哉汝
弟雖好學無汝應變才留兒在家中吾行方放懷此厄
疑可逃設想我不來汝我永相守槁餓無大災而況未
必餓來當攜汝偕初未計及此今則心徒摧唐君念慈酷
愛汝賞汝非凡材代汝規進身召汝類我催回數催我
日汝已成枯骸三七我竟忘伊為汝營齋家書速我歸

此口終難開滿政吾必旋昇汝將親埋附我生塚旁俟
時吾不哀

生日感作寄喬平八弟

五十年前墜地時試啼豈料及如斯問天生我原何意
渡海依人頗自疑強以當歸寬病婦忽然有觸念亡兒
生朝過後為郎罷此語回思益可悲

子得子晚先慈
望墓切一日召

日者使算子命曰過了生日便為郎罷其
言果驗及今悲重思那郎罷閑語謂父

予李前生與有因弟兄初度乃同辰事親汝得無多日
閱世吾成過去人悲憶東頭曾共住定原南阮是真貧
同居不竟
恒引為憾何時歸挈檀香佛便約聯床醉顚濱

再讀新加坡雜詩 其十六

海濱地斥鹵水泉滌絕軍堰谷蓄山雨用計至精悍溝
通布脉絡萬家足漱鹽頗聞三月儲足支十年早我來
為尋源創獲飽游眼掩遶山幾曲草樹若新浣一亭水
中央板橋紅闌短豈惟舟楫絕鷗鷺迹常斷寂寞自可
娛未敢多挈伴正虞幽景破不得襟袖滿

其十七

築園如作畫幽窈為要著此技倪迂精笠翁亦不惡疊
石無半畝能辦千邱壑茲園

亞刺伯花園

貌平遠無取壁險

削隔岸三螺鬟起伏互參錯平蕪接翠微池淥供襯託
一徑迴松杉交曠為斂卻絕似銷夏灣江南眼前落玉
虹似未稱我意宜略約狂欲呼主人剪裁與商酌

其十八

南果歲再實博贈名莫詳嗜好人各殊未可輕評量冷

塞與羅菰水稜同甘芳

二果相若細辨莖如瑪腦

毛丹荔變種頑實

凝瓊漿未可齒離支色味微欠香

有毛者曰紅毛丹無毛者曰白毛

丹頭較甘惜無香皆為支變種

鮑肆買榴連居人爭傾囊恐飢可無米

慰饒寧脫裳

榴連奇異居人嗜之至有榴連熟沙即脫之誰沙即裳也謂宜與購

薰藉無

定相衆愛斯擅場未曾食馬肝不知味何妨任客笑我

痴辜負來南方

其十九

南邊如病疴寒燠失常稟旋晴便炎歎一雨亦淒凜秋
冬多淫霖捐扇可就枕得隴更望蜀人情每有甚望雨

如望雪圍爐想痛飲買炭洗爵待不雨議屢寢晨興陰
雲合夜醉預見諗豈知羅羹材晚霞復似錦違天逐口
腹茲事思之稔嘗鼎能幾何所失汗如瀦

其二十

我本生南方食不避蛙蛤過海日議鮑割烹品益雜黃
侯誇鼯鼠見招卜噬嗑主客如餓鴟下箸賤鳬鴨只恐
嗜成癖百味同嚼蠟射生惜未見肉翅想開闔一身兼
五能乃為人所獵頗聞網羅汝未可用常法美肥卽汝
罪張湯世豈乏今夜夢菜園不僅有羊酪

其二十一

杜老居秦州寄詩覓胡縣詩人率愛此李約亦養猿吾

性喜遊人頗欲遊其羣不圖城市中乃有欄猴園長林
蔭百畝畀遂生息蕃既無狙公司不設垣與樊游人許
與狎誘致當罰鍰誘致者罰四幣二十五枚公然出乞果道旁呼類
蹲愧我困布袋無物以示恩歸來猶驕人路隅哀王孫

其二十二

禽鳥驅賭勝觀闕吾已厭闕魚殊創聞停足待一驗鱗
鬣才及寸氣奪百喙噉瑞盂各隔絕見影蓄殺念努目
揚脊鱗儼若士負劍非類苟強合其鋒未易飲問價尾
一金買歸我猶欠玩物近頗戒知魚散自惜哀哉九州
民游釜懾敵焰相賞當式蛙茲魚信不忝

EAST ASIAN STUDIES

怡園詩集卷四

YORK UNIVERSITY

JUL 5 3 2011

1000 1000 1000

Blank page with faint vertical lines and a large rectangular border.

